

Gandhi Memorial College of Education Bantala Jammu

पोश गोंद

(बोग दौयुम)



सन्तोष शाह 'नादान'

पोशु गोंद-II

(बोग दौयुम)

सन्तोश शाह 'नादान'

(नोट : सौरी हकूक छि
श्री महाराज कृष्ण बम्बरु सुंदि नाव महफूज)

| | | |
|----------------------|---|--|
| किताबि हुंद नाव | : | पोश गोंद - ॥ |
| कवियत्री | : | सन्तोश शाह 'नादान' |
| नागरी लिपी शवद कर्ता | : | पृथ्वी नाथ कौल 'सायिल' |
| कम्प्यूटर (D.T.P) | : | रिकू कौल |
| | | IILS D.T.P Centre, Muthi, Jammu, 0191-2598636, 9419136369 |
| म्वल | : | Rs 50/= |
| छपन वेरी | : | 2010 ई. |

किताब मेलनुक पताह:

1. पोश गोंद रूप अरजुन दायुत,
मोहला गुजराल, लेन न.०1, ओलड चुंगी,
कैम्प रोड, तालाब तिल्लू, जम्मू। फोन 9419113193
2. दुर्गा प्रिंटिंग प्रेस, जम्मू।
3. चंडी आश्रम, (देवका के नज़दीक) उद्मपुर।
4. स्वामी कुमार जी आश्रम मुठ्ठी, जम्मू।
5. भूषण लाल, धार्मिक पुस्तक बंडार, जम्मू।
6. कौल एलकट्रानिकस, पुरखू कैम्प, जम्मू।
7. स्वामी नन्द बब आश्रम, मुठ्ठी, जम्मू।
8. स्वामी स्वयमानन्द आश्रम, मुठ्ठी, जम्मू।
9. बादशाह कलंदर आश्रम, पटोली, जम्मू।
10. विजेशवर जोतिश कार्यालय, चिनोर, जम्मू।
11. ओम बाव कोसम, दास बया, पुरखू कैम्प।

POSHI GOND

Collection of Poetry

(Part-II)



नाव : सन्तोष शाह (बम्बरु)



तख्खलुस : 'नादान'

पिता सुंद नाव : पं० नंद लाल शाह

मातोंय हुंद नाव : श्रीमती शोभावती

महाराज सुंद नाव : श्रीमहाराज कृष्ण बम्बरु

असली स्कूनत : मोह० गंजीवारा अनंतनाग, कश्मीर



यि पोशि गोंद छु म्यान्यन गरु महाराजन
महात्मा श्री हरि कृष्ण जी तु
महात्मा रमेश आनन्द चैतन्य सौबस अर्पण



- | | |
|---|----|
| 1. येछि पछि मे गरु सु ज़ामय | 1 |
| 2. किथु पौठ्य वनय व्वन्य हे बबो | 2 |
| 3. स्यठाह छिम सॅन्य मे ज़ँद्य बदनस | 3 |
| 4. जंगलन छु आमृत पुर बहार | 4 |
| 5. दोह राथ बरन्यन वॅथ्य थॅव्य मे तौर्य | 5 |
| 6. बलय दर्शनु चाने | 7 |
| 7. चु छुख आश्रय म्योनुय | 8 |
| 8. चानि माये मे लीख्य कौत्य छंद लोलो (बादशाह कलंदर) | 9 |
| 9. छुमा चोन सहारय (बादशाह कलंदर) | 10 |
| 10. यिनु चानि चलुनम सौरी द्वख | 11 |
| 11. सौरुम नु दय ज़ांह में याद पावुम | 12 |
| 12. सतु रेश्य सौबन कॅरनम यौरी | 14 |
| 13. संगदिल मे वनतम बु छुस मा अलावय | 15 |
| 14. लोलु हत्यन माय बरुनुये | 16 |
| 15. कति बु छ़ांडथ पीरु म्यान्यो | 17 |

येछि पछि मे गरु सु चामय

येछि पछि मे गरु सु चामय, लालु आमय सॉलिये ।

शामस सँहर बन्योमय, लालु आमय सालिये ।।

दोपुनम चु कूरय म्यौनी, बुथि कर्म बूमी चाँनी,

हमुवार चु यिछ बनावख खीत्य रोज़ि तिछ फवलौनी ।

पलि नाय मे केह ति प्योमय, लालु आमय सॉलिये ।।

बूगुन छु रुत तु कुत फल पथकालि छुथ सौबुरमुत ।

लोणख तिथुय तिथुय फल रेलि यिय चे आसि वोवुमुत ।

हुनि हुनि मे यिय सन्योमय, लालु आमय सॉलिये ।।

येति बौहकुन कूरय रोज़ अबय, पानय बनिय बयस ज़य,

कर कर्म फर्ज चु मॉनिथ, कर्मस चु सुत्य थवुन दय ।

त्रामस मे स्वन बन्योमय, लालु आमय सॉलिये ।।

बौहदुर मे नाव द्युतनम, कृष्ण बाव रगन मे बोरनम,

वेगु व्याद दूर सपदान, लेखुन्य मुश्क मे दिचनम ।

कथव रुप रस मे चोमय, लालु आमय सॉलिये ।।

शोहरथ रलान छि पांनिस, दनु छुय येतिय चे त्रावुन,

न्युन छुन केह पानसुय सुत्य, अंदरिम शँथुर छु गालुन ।

पदिनुय अहं पुशरुमय, लालु आमय सॉलिये ।।

बावय मे मोन सोरुय रचि रचि थौवुन मे मीज़ान ।

अनुबव गँयेम मे सुत्य सुत्य, बौहदुर बन्योव नादान ।

वेतुरुन मे दोद प्योमय, लालु आमय सॉलिये ।।

किथु पॉठ्य वनय व्वन्य हे बबो

किथु पॉठ्य वनय व्वन्य हे बबो, दूरयर मे चोनय ज़रुन हा प्योम ।
कन्यन मे म्वख्तु जरुन हा प्योम, दूरयर मे चोनय ज़रुन हा प्योम ॥

यिमन वतन वतु हावुक बॅनिथ, दूरयर स्यठाह नज़दीक प्योम ।
तिमनय वतन वापस कॅरिथ, मनु म्योन कूत अशान्त गोम ॥

दि मे मोकु व्वन्य यिनुकुय चु तोर, हंसा बॅनिथ व्वन्य तुलु बु दोर ।
वाक्य गनेमुच मे कल स्यठाह, कोताह वनय प्यतरुन मे प्योम ॥

दिमु छालु बालन तल स्यठाह, वुछि माजि कोताह याद प्यमा ।
गॅन्डिथ बु गुल्य होशान यिमा, पतु माजि ब्रोंठ कनि रोज़ मोम ॥

लुख पामु मा दिन यिय पॅरिथ, क्या खबर तिमन छेय क्या सौरिथ ।
यि मे हाल बोवमुत छुम बबस, तिना कॉन्सि निश वॅनिथ ह्य़चोम ॥

करयो बु पोशि वथुरुन हा च़ेय, प्यमुयो बु तल पादन हा च़ेय ।
प्रुछुयो यि तेलि कमिकुय सज़ा, अमर्यथ मे द्युतमुत छुय च़े चोन ॥

छुम सायि हर विज़ि चोन चलान, रूदस तु तापस सुत्य पकान ।
कर दँदवनस शहज़ार व्वन्य, युथ मनकुय ज़लिह मे बोम ॥

छुम जेरु यिवान यिय सोरिथ, कत्यू ब्यूठहम वादा कॅरिथ ।
ह्यकु ना बु लुकु गेलुन जॅरिथ, यिहा हनि हने सॅनिथ मे गोम ।।

छुम साल कोरुमुत अज़ मे च़ेय, यितु चंगु वायान निशि हा मेय ।
वति प्यठ यिथुय वति मा डलय, नादान वनान अमुर्यथ मे चोम ।।
किथु पॉठ्य वनय व्वन्य हे बबो,
दूरयर मे चोनुय ज़रुन हा प्योम ।

10 Jan 1987



स्यठाह छिम सॅन्य मे ज़ँद्य बदनस

स्यठाह छिम सॅन्य मे ज़ँद्य बदनस ।
गॅमुत्य चाने छि अमारय, गॅमुत्य चाने छि अमारय ।।

बु हावय नॅन्य च़े छ्वख बदनक्य, तिम आमुत्य पनुन्यव कर्मव सुत्य ।
बु लागान पानु देजि ज़ख्मन, बलान छिम चानि हुकमय सुत्य ।
बन्यम मरुहम मे स्योद ज़ख्मन, करुन छुय त्युथ च़े कांह चारय ।।
छि क्रेछय वतु च्वापॉरी, छि बासान मेछि च़ेन्तनु सुत्य ।
लबान छिय अंद यिम गॉमुत्य बंद, सहज छुख बनान कीर्तनु सुत्य ।
कॅरुम सुमरन मे च़ोलुम कूत, मे दोदमुत सीनु छुम नारय ।।
मे दूरयर चीन ज़ोरुम कीताह, वादुम कीताह औसुम कीताह ।

छि दग अमिचिय मँदर आसान, मे व्यछुनोवुम ह्योकुम यूताह ।
 गँछुम चॉनी कृपा आसुन्य, बन्यम अनुग्रह बु लबु तारय ॥
 बु परछेन्य छस गँमुच कौँचाह, मचर आमुत मे दूरयर सुत्य ।
 हचर लद छस बु व्यछुनावान, पज़र ननि चानि दर्शनु सुत्य ।
 वनुम जल जल मे पय पनुनुय, वनान 'नादान' छे तूर्य लारुय ।
 स्यठाह छिम सँन्य मे जँद्य बदनस, गँमुत्य चाने छि अमारय ॥

11 Jan 2008



जंगलन छु आमुत पुर बहार

जंगलन छु आमुत पूर बहार ।
 अज़ योर अनतन दिल करार ॥

कृति दूर थोवथन यूरय अनुन,
 तस रोस नु शूबान कौँन्सि वनुन ।
 बोज़ि ग्रावु द्यवु लँगिहे मे तार ॥

बागस छु बागवाना बकार,
 तमि सुत्य छु अथ रोज़ान व्यकार ।
 छिय शोक फवलान तेलि गुल तु गुलज़ार ॥

छुय बाग सुय बैयि राग सुय,
 रावान कवु छुम मे वनुनुय ।

शेहलावि कर दिलकुय सु नार ॥

प्रेयमुच वुज़िन्य छु यि चोन मन्दर,
 तेलि क्युथ मे वेह दिलसय अंदर ।
 कर ब्रम मे दूर शत्रन चु लार ॥
 प्रज़ुनाव तय म्योन औरचर,
 शामस करतम मौज सँहर ।
 लब परनु रोस ग्यानुक बंडार ॥
 वनतय बु छसना च़ेति बकार,
 सेदि स्योद करतम चु ति नकार ।
 'नादान' करान मौज ज़ारु पार ॥
 अज़ योर अनतन दिल करार ॥० ॥



15 Jan 1987

दोह राथ बरन्यन वँथ्य थँव्य मे तौर्य

दोह राथ बरन्यन वँथ्य थँव्य मे तौर्य,
 सूंचुम सु मोल म्योन यियि मा यपौर्य
 मगर ऑखुरी क्या वनय बु मँशिरावनस ॥

च़े मँशरोवथा ॥० ॥

दछि कुल्यन छि द्रामुच़ दशि मति म्यानि यिखना यपौरी,
 नोव बहार छु आमुत यारि फोजिमुच़ छि पँज़्य पौठय च़वपौरी ।
 वन नँन्य पौठय गोसु क्याह गोय हे गमखार च़े म्योन ॥

च़े मँशरोवथा ॥० ॥

वन चु साथा यिख कर पामु दिय दिय मे करिहेम ओली,
 दितु मे पानु दर्शुन गाह त्रावान बासतम च्वापौरी ।
 चोन दिमयो खूनि जिगर मखुमल वथुरुन बु त्रावय ॥

चे मॅशरोवथा ॥०॥

सुत्य सुत्य रोजुम कांह ना दुश्मन मे ज़ांह कॉल्य पोर्यम,
 वर दितम मे त्युथ युथ चॉन्य बॅखती यिना ज़ांह मे सोर्यम ।
 तल पादन जाय म्यौनी कन थवतम मे नादन ॥

चे मॅशरोवथा ॥०॥

लालु सॉलस छु द्रामुत क्याज़ि रूज़ुम नु तॅमिचिय मे खबुरय,
 पोशि बागस छु चामुत क्याज़ि थावनम न तॅमिचिय मे खबुरय ।
 रोशि वलो पोशि कने वादु हो याद पावय ॥

चे मॅशरोवथा ॥०॥

नालु दिवान छु 'नादान' पादन लगिय ना सु पौरी,
 कथु करिहे ब्रोंठु कनि प्रकरमस येलि मेल्यस वौरी ।
 सालु कॅरिथ प्यालु बरय, कर्म खुरय च़ेय हा बावय ॥

चे मॅशरोवथा ॥०॥



20 Jan 1987

बलय दर्शनु चाने, वलो म्यानि ग्वसाने

मे रंग्यमय जामु पनुनी, चु प्रारान यिम गॅछय छेनुनी ।
चे रोस कुस मे पहिचाने, वलो म्यानि ग्वसाने ।।

बु कूताह दूरयर ज़रय, मरय मा चाने शरय ।
सु युन गछुन मा बेमाने, वलो म्यानि ग्वसाने ।।

छि क्वदरत सॉरुय तँती, फर्क छसनु आमच रँती ।
चोलुख येलि रोज़ु साने, वलो म्यानि ग्वसाने ।।

मे बूजमुत छु अनुग्रेह बनान, कांह छुनु खॉल्य नेरान ।
कर स्यज़र मे ड्यकुलोन, वलो म्यानि ग्वसाने ।।

चंडीबाग चोन आसन, अँस्य छि चंडीगामि छारान ।
छा ठीक यि मे कोड माने, वलो म्यानि ग्वसाने ।।

मे थोवुम सु दोह अख याद, मे वोनमय चे बूजुथ फँरियाद ।
वसान आसु रूदु शाने, वलो म्यानि ग्वसाने ।।

योत छु आमुत 'नादान', सदा रूद नालु दिवान ।
छलान पाद अशिवाने, वलो म्यानि ग्वसाने ।।



25 Jan 1987

चु छुख आश्रय म्योनुय

चु छुख आश्रय म्योनुय ।
चु बंद बादव छुख म्योन ॥

चे मँशिरुथ वादु प्रोनुय, चे गंजुरुथ नाव म्योनुय ।
छा त्रावान अडु प्रोनुय, चु बंद बादव छुख म्योन ॥

मे कँरथम राहगीरी, सनेयस अथ फकीरी ।
मे कूत प्योम प्यतुरोनुय, चु बंद बादव छुख म्योन ॥

सन्योमुत छुम वारय, बु करुहा कथु तारय ।
मुलाकात गोछ न छेनुनुय, चु बंद बादव छुख म्योन ॥

यितु व्वस्तुकार लॉगिथ, मे थावतम पूरु सॉमिथ ।
चे रोस कुस छु डौख म्योनुय, चु बंद बादव छुख म्योन ॥

छंजेयम बाल कॉत्याह, दिचॉयेम नालु कॉत्याह ।
लालु यियि व्वन्य सालु सोनुय, चु बंद बादव छुख म्योन ॥

चु ह्यतु व्वन्य नॅन्य पॉठ्य साम, चे रोसतुय क्युथ मे आराम ।
ब 'नादान' छसया चॉनी, चु बंद बादव छुख म्योन ॥

बादशाह कलंदर

चानि माये मे लीख्य कौत्य छंद लोलो ।

बरु मुचुरिथि रोजुम अंदु वंद लोलो ॥

मे छि खबरुय सौरुय कर्मच हान,

रुखु स्यजुराव पानय तिय गछि जान ।

ग्वडु सोंतय मे कर प्यवंदु लोलो ॥

बर मुचुरिथि रोजुम अंदु वंद लोलो ॥

कर्मव किन्य तिम कोरि छय राजे,

बुथि नेरान बब पतु पतु माजे ।

तिम कोरि हुकुमस पाबंद लोलो ॥

बर मुचुरिथि रोजुम अंदु वंद लोलो ॥

मा वुन्युखतौन्य बबन कौन्सि हिय रँटिमत्य,

मालिन्य गरि माजि मा छि शुर्य कँडिमत्य ।

मा छिख कँरिमत्य रंगु रंगु फंद लोलो ॥

बर मुचुरिथि रोजुम अंदु वंद लोलो ॥

असि हौंविथ द्युतमुत प्रहलादन,

पुशि त्रौवुस दयन हौंजन तु रादन ।

तैम्य बनोवुस ज़हरस कंद लोलो ॥

बर मुचुरिथि रोजुम अंदु वंद लोलो ॥

यितु साथा व्वलु बेह म्यानि जाये,

वुछ मज़ु क्युथ दजुवन्य लोलु क्राये ।

पॉन्य पानय गछख शरुमंदु लोलो ।।

बर मुचुरिथ रोजुम अंदु वंद लोलो ।।

गछ बेदार ज़ार छय वनान 'नादान',

युस समयुक आसवुन छु टोठ संतान ।

छुय गनीमथ प्रोनुय जंदु लोलो ।।

बर मुचुरिथ रोजुम अंदु वंद लोलो ।।



5 Oct 1993

बादशाह कलंदर

छुमा चोन सहारय, वलो नवबहारय ।

संमा छुय रंगीन, कवो छु हम गमुगीन ।

वनुम तूरय लारय, वलो नवबहारय ।।

चु छुख पानु बादशाह, वनान केंह छिय शहनशाह ।

यिहम कर दुबारय, वलो नवबहारय ।।

बूजुख शहरु गामय, कॅरिथ प्वखतु जामय ।

थवान रुम करारय, वलो नवबहारय ।।

तॅमिस क्या सना गम, येमिस सर छु सरखम ।

वुछान छुय नज़ारय, वलो नवबहारय ।।

ब 'नादान' मिस्कीन, मगर छसया तॉबीन ।

बू कूत काल प्रारय, वलो नवबहारय ।।



10 Oct 2007

यिनु चानि चलुनम सॉरी द्वख

यिनु चानि चलुनम सॉरी द्वख,

म्वख हावतो मारयमत्यो ।

चानि प्रकाशि सुत्य मेल्यम स्वख ॥

म्वख हावतो मारयमत्यो ॥०॥

क्या खँटिथ छु च़ेय निशि तिय बु वनयो,

कीवल च़ोवापॉरय वॅन्य बु दिमयो ।

ज़ीठ छम क़ूठ वथ छोटुरावतो ॥

दित्य सदा मे विज़ि विज़ि चान्यन बरन,

कर्म फल कोताह छु तच़र करन ।

किथु पॉठ्य च़ालुन छुम यि मच़र हेछिनावतो मारयमत्यो ॥

लँजिमच़ थरि छस अडुफोल पोश,

हौशस मंज़ अनुम छस बेहोश ।

पनुने दयायि सुत्य यि अडुफोल पोश फोलुरावतो मारयमत्यो ।

मे बूगुम कोताह छस बूगान,

तवय छस ग्वरस कृपा मंगान ।

सिरियि तु च़ुँदरम सुँद्य पॉठ्य प्रज़लावतो मारयमत्यो ॥

पनुन सीर दपान गछि नु कॉन्सि वनुन,

या गछि तथ कांह सु चारु करुन ।

कर चारु 'नादानस' नतु वादु पनुन याद पावतो मारयमत्यो ॥

म्वख हावतो मारयमत्यो ॥०॥

16 Dec 1987

सोरुम नु दय ज़ांह में याद पावुम

सोरुम नु दय ज़ांह में याद पावुम ।

बहार हावुम, बहार हावुम ॥

बु छसना अनपड बु छसना अहंमक,

वन्यम येलि कांह खस्यम शरारथ ।

अनुबव मे छुम कार करान कुसतान्य,

वनान मे कोर कार यि ओस मेय तान्य ।

दितम मे शॉन्ती गावु मकुलावुम,

बहार हावुम, बहार हावुम ॥

गाहे मे लुख वुछ्य असान गिंदान,

गाहे मे लुख वुछ्य वदान, रिवान ।

गाहे मे लुख वुछ्य दवानु लारान,

गाहे मे तिम वुछ्य सौतुय पकान छिय ।

सनून न कुनि ति रंगस हेछुनावुम,

बहार हावुम, बहार हावुम ॥

बु छस यि ज़ॉनिथ कवु द्वदरेमुच,

बंद बु गॉमुच छस वालुवाशे ।

बख्श मे सॉरी छिम पाफ कॅरयमुत्य,

म्वकलान सॉरी छि चानि आशे ।

संसार रुपी सागर स्यठाह सोन,

मे बोठ खारुम, बहार हावुम ।

बहार हावुम, बहार हावुम ॥

मे क्या वनुन छुय सौरुय पता छय,
 गथा मे बख्शुम छस गीर गॉमुच ।
 छसय बु तीर ज़न तरकशु द्रामुच,
 करुम सॉ यॉरी छस पथर पेमुच ।
 ब्रोंठु कनि बाग छुय पानु सगुनावुम,
 बहार हावुम, बहार हावुम ॥

पनुन व्वपर गछि नु ज़ांह ति ज़ानुन,
 पनुन्य खून सुत्य गछि सु सगुनावुन ।
 यिहोय छु लारुन ब्यन गछि नु ज़ानुन,
 यिहोय छु पोशुवन च़े मालि अंदुवंद ।
 करुम सॉ प्यवंद ग्वड बरुनावुम,
 बहार हावुम, बहार हावुम ॥

मे द्राव तमना 'नादान' मॉनिथ,
 दूरदानु वोनथम बाग्यवान वोनथम ।
 चानि अनुग्रेह सुत्य बलय बु वारय,
 छुय ना च़े चारय मे कूर वोनथम ।
 करुम सॉ मुनवर चु बाग छावुम,
 बहार हावुम, बहार हावुम ॥



24 Jan 1987

सतुरेश्य सौबन कॅरनम यॉरी

सतुरेश्य सौबन कॅरनम यॉरी ।

बूजनम जॉरी कन दौर्य दौर्य ॥

जंगलस मंज बिहिथ मस्तु कलंदर,

अंदरी अंदर अचुन छु तोर ।

यकदम मुचुरिन बरन्यन तॉरी ॥

बूजनम जॉरी कन दौर्य दौर्य ॥

पाद मेय छेलिमस सुत्य अशिवाने,

अख फ्योर नाय गव बेमाने ।

छि रटान पाद तस गाटल्य तु चॉरी ॥

बूजनम जॉरी कन दौर्यय दौर्य ॥

तंजि बारगायि मंज म्वल दिल फुटनस,

अचुनस छि दिवान तॅस्य तॅस्य वॉरी ।

हजि रुखु सेजुरान खुरय कडान सॉरी ॥

बूजनम जॉरी कन दौर्य दौर्य ॥

दशिमति दशि युस गंडान छुय नागस,

यिवान बेयि येलि फ्वलान गुल बागस ।

दस्खत छुख करान गुल फ्वलान सॉरी ॥

बूजनम जॉरी कन दौर्य दौर्य ॥

समुयस ओदीन छे प्रथ कांह कथ,

समुयस ओदीन वछिम नॅन्य दयगथ ।

जल जल मे वॉलिन पापुन्य बॉरी ।।

बूजनम जॉरी कन दॉर्य दॉर्य ।।

किथु वाति 'नादान' दूर्यर छु मारान,

छायन तु ग्रायन छे पतु लारान ।

व्यनु पोश लागुहस बु लगस पॉरी ।।

बूजनम जॉरी कन दॉर्य दॉर्य ।।



22 May 1988

संगदिल मे बनतम बु छस मा अलावय

संगु दिल में बनतम बु छस मा अलावय ।

मे लोगमुत जलावय दादि चाने ।।

चँजिस तति चे त्रॉविथ तवय मा बु हॉरिथ,

थँचिस व्वन्य बु प्रॉरिथ स्यठाह बोर सॉरिथ ।

दगि रोस दौद कस गॉरस हावय ।।

मे लोगमुत जलावय दादि चाने ।।

वुठन प्यठ शिकायत थँवुम ना मे अंदरी,

यिहम कर स्वन्दरी जामु पुरिथ ।

दिमय चोन पनुन खून छुहम बोड सखावय ।।

मे लोगमुत जलावय दादि चाने ।।

पानस मे तकसीर त्रौवुम यहातय,

वोनथम गछि कूरय बते तुरय वातय ।

अगर छुय शुबाह केह चॅटिथ सीनु हावय ।।

मै लोगमुत जलावय दादि चाने ।।

ज़न टिकुवावुज्य ब्रमान म्योन मन छुय,

‘नादान’ दन छुय आगरुक नूर ।

सम मै थावुम नियेम यिनु बहावय ।।

मै लोगमुत जलावय दादि चाने ।।



10 March 1990

लोलु हत्यन माय बरुवुनये

लोलु हत्यन माय बरुवुनये ।

ग्वरु सायस आसवुनये ।।

अथु रॅट्य रॅट्य युस हेछुनावान, साकारस पूज करुनावान ।

सग्वन रुपस लय करवुनये, ग्वरु सायस आसवुनये ।।

मायि बॅरयतिस माय बरुनावान, न्यरग्वन न्यराकारस छारनावान ।

कथुनुय मंज़ होश अनुवुनये, ग्वरु सायस आसवुनये ।।

मनकुय मल पानु छलुनावान, श्रदा सबूर मंजस बेहनावान ।

क्वबोज़ थ्यर बोद करवुनये, ग्वरु सायस आसवुनये ।।

संसॉर्य रुप सर्फ मारनावान, कुन्य मंथुर कंठस्त करुनावान ।

बावु अमरयथ खॉस्य बरुवुनये, ग्वरु सायस आसवुनये ।।

लरि ग्वर थँविथ कर कर्म सॉरी, बरन्येन यिनु मुच्चुरन तॉरी ।
बस छु नैष्ठा सरु करवुनये, ग्वरु सायस आसवुनये ॥

छु नु मंगनुय न छु मंगनावान, बावच जूल्य पानु बरनावान ।
रोशि रोशे होश अनुवुनये, ग्वरु सायस आसवुनये ॥

छुनु छारान निर्धन तु दनुवान, न छु छारान बोजवान तु 'नादान' ।
कृष्णु बावु रंगस रंगुवुनये, ग्वरु सायस आसवुनये ॥



17 Aug 2007

दितिम वॅन्य कति बु छान्डथ पीरु म्यान्यो

दितिम वॅन्य कति बु छान्डथ पीरु म्यान्यो ।

चे रोस मा लवु बु खॅन्ड हार सीरु म्यान्यो ॥

चु रूदुख पानु ब्यूठुक बालनुय प्यठ ।

नँ सूंचुथ काँसि गछि मा सीरनुय स्यठ ॥

मे दूरयर चोन छुम तीर पीरु म्यान्यो ॥

गॅयम कॅन्ड्य लॉर्य पदिनुय येलि छॉन्डुम वथ ।

बु त्रॉवथस बाल अपोर कस सुत्य बु करु कथु ॥

सहाय छुम पोशवुन चोन पीरु म्यान्यो ॥

दित्रॉयथम कुत्य दौर्य तारु तरनस ।

मगर क्या छुम खबर छिम पत मे लमुनस ॥

अजेय कथु पूर बु करहा पीरु म्यान्यो ॥

जवाब छुम चुन मै आमस योद चु मेलख ।
ज़बर क्या गछि अगर तकदीर मै शेररव ॥
डँखिस कोरे चे हियुव बब पीर मयान्यो ॥
करान छस जस्तुखाज़ किथु पॉठ्य लग्यम तार ।
ग्वबे नैन्द्रे छि नादान करतन चु बेदार ॥
छु गम क्युथ कवु बु दिलगीर पीरु मयान्यो ॥॥



21 Aug 2004

दीवी बोग

| | |
|--|----|
| 1. कर कबूल प्रनाम म्योनुय | 20 |
| 2. ब छस नादान वन्दुयेय जान | 20 |
| 3. हतय वेसिये तरव बालस | 21 |
| 4. चँडय गामि माँज्य म्याँनी | 22 |
| 5. ज़ोरु ज़ोरु वँन्यतव | 23 |
| 6. मे क्याह खबर मन कँम्य हैछिनोवुम | 24 |
| 7. माँज्य म्याँनी बोज़तय ज़ारुपारु म्योन | 25 |
| 8. ज़ार बोज़ुम बु वंदय जान | 26 |
| 9. सेदि स्योद मे अज़ सोदा बन्योव | 27 |
| 10. मै खिर खंडु थाल बैरिमय मायि चाने | 28 |
| 11. थोद मै तुल मय पथर त्राव | 29 |
| 12. म्वख्तु ड्यकस चूनि जरान | 30 |
| 13. अनुग्रेह करुम द्यवु लंगि मे तार | 31 |
| 14. माता र्वपु भवॉन्य | 32 |

कर कबूल प्रनाम म्योनय

कर कबूल प्रनाम म्योनय, सरस्वती म्खुस मे रूज़िन ।
 सगुनाव मन चु जीवन, ज़ेवि प्यठ सदा मे रोज़ुम ॥
 बुंज़िस अँकिस तिम मँशिरन, द्वखु दौद्य ज़न्मु ज़न्मुक्य ।
 वर्तीव पोशु ज़ेवि सुत्य, शीरिन्य कलामु सोज़ुम ॥
 येरान ज़ाल छि पानय, कथ बेयिस छि हान खारान ।
 खोट बनान छु सुय बहानय, अंदुकार पानु कासुम ॥
 कर व्वन्य क्षमा चु पापन, मेकराज़ वाय शापन ।
 बावुहा बु दौद्य पनुनिय, तीत्य रुत्य कलामु सोज़ुम ॥
 सासुबेद्य प्रनाम चे बेविनय, डोख चोन सदा मे रूज़िन ।
 गुल्य गँड्थि मंगान छे 'नादान', वनुनुच अदा मे सोज़ुम ॥



23 June 2004

बु छस नादान वन्दुयेय जान

बु छसु नादान वन्दुयेय जान ।
 म्योनय प्रणाम चे छुय पादन ॥

न ज्ञानय पाठ तय पूज़ा, न प्रोवमुत ग्यान बेयि संद्या ।
 मे क्या म्वलुवुन छु येलि आसय, पम्पोशि पाद चेय छलुवुन्य ॥

मे छम आशा दिलस अंदर, तेलि क्याज़ि छख चु ब्यन ज़ानान ।
बु लागय ना येमिय म्खय, च़ेय ब्रौठ कनि दोहय वनवुन ॥

खता क्या छुम मे तिय वनतम, द्वख दौद्य सौरी व्वन्य मे हरतम ।
यिथुय बास्यम ग्वलाब म्खु चोन, च़ेय ब्रौठ कनि द्वहय असुवुन ॥

बु आयस क्याज़ि संसारस, चंद छैन्य छस बु व्यवहारस ।
अंजाम छख अनान कारस, यिहय रोज्यम द्वहय ननुवुन ॥

ब्रमान मन छुम मे दूरि दूरे, माजि वुछान त्रावान पूरे ।
यितु नैन्य पौठय नतु बासान, छुय 'नादान' द्वहय मरुवुन ॥



18 Jan 1987

हतय वेसिये तरव बालस

हतय वेसिये तरव बालस ।
वनव सौरुय तस बालुयारस ॥

बावय सौरी तस दौद्य तय गम, फबान दौह पतु दौहें सोनुय अहं ।
छठ कँडमुच कामु कूद लूबन, प्यमव पादन तस गुमखारस ॥

राग बेयि दुयि छु वोल्मुत नाल, नशन हाल सोन कोरमुत बेहाल ।
गौमुच हंसानियत बदनाम, वनव वारय तस नवबहारस ॥

चु बब छुख म्योन, बु छस चॉन्य कूर, यि वेंनिथुय क्याज़ि चोलहम दूर ।
चे रोस कुस मे करयम प्रुछु गॉर, प्रुछुव वारय तस नवबहारस ।।

मे अथु डालतम यिमन शापन, मे रोट करतम यिमन पापन ।
मुंह अंदकार व्वन्य मे कासतम, दिमव नालय तस गाशदारस ।।

नादान मनु किन्य अनन सालय, वनस सॉरी पनुन्य हालय ।
वेंनिथ सौरुय बरस प्यालय, बावस हय सीर सीरदारस ।।

22 Jan 1987



चँड्यगामि माँज्य म्यॉनी

चँड्यगामि माँज्य म्यॉनी, वनतु कूत काल प्रारय ।

अनुग्रेह बख्तयन प्यठ छख करान वारु वारय ।।

आयस यथ बरस तल, करतय मे मन न्यरमल ।

युथनय केंह बेयि बु छारय, वनतु कूत काल प्रारय ।।

चॉनी रुच नज़ुरा, पँज्य किन्य छय पज़रा ।

त्रावतय मे वारु वारय, वनतु कूत काल प्रारय ।।

खारतय चु बोठ म्योन बाव, मंज़ सदुरस छम नाव ।

गाठुक मे इंतिज़ारय, वनतु कूत काल प्रारय ।।

चन्यचल मन परेशान, कोनु दिनस वार ज्ञानान ।

चल्यम कर मे लार लारय, वनतु कूत काल प्रारय ।।

अशिवानि पाद छेलिमय, व्वन्य दलिस तल मे ह्यतमय ।
 वदान छस बु अमारय, वनतु कूत काल प्रारय ।।
 बॅन्यतन मुशकिलन हल, गारतम बैयि जल जल ।
 'नादान' शेहलावुन नारय, वनतु कूत काल प्रारय ।।

25 Jan 1981



ज़ोर ज़ोर वॅन्यतव

ज़ोर ज़ोर वॅन्यतव ।
 जय माता दी, जय माता दी ।।

ग्वडु तरसाँवनस, पतु शेछ सूज़ुन पतु शेछ सूज़ुन ।
 तूरय मंगुनॉवनस, जय माता दी, जय माता दी ।।
 कथ पोंशि प्रुछनम, ओश व्वथरोवनम, ओश व्वथरोवनम ।
 न्यूमुत द्युतनम, जय माता दी, जय माता दी ।।
 तसला द्युतनम, बजिराह ग्योवमस, बजिराह ग्योवमस ।
 अथु रोट कोरनम, जय माता दी, जय माता दी ।।
 राथा दिचुमस, ख्वश ख्वश सूज़नस, ख्वश ख्वश सूज़नस ।
 अतुगथ द्युतनम, जय माता दी, जय माता दी ।।
 कर पनुन्य पॉरयज़ान, वदुन त्राव जानान, वदुन त्राव जानान ।
 'नादान' वोनुनम, जय माता दी, जय माता दी ।।



मे क्याह खबर मन वॅम्य हैछिनोवुम

मे क्याह खबर मन वॅम्य हैछिनोवुम ।
प्रोवुम येलि चोन द्वार ॥

पनुनी ग्वरन ब्रोंठकुन पकुनॉवस,
चॉवनस सातु सातु अमर्यत दाम ।
ग्वर सुंद बजरा हर विज़ि वखनोवुम ॥
प्रोवुम येलि चोन द्वार ॥

पनुन्यव तु परद्यव क्या मंदुछॉवस,
अँन्दरिम्य शेत्रव मदु वॉजिस ।
अग्यॉनी मंज़ शब्द व्यछुनोवुम ॥
प्रोवुम येलि चोन द्वार ॥

मँग्य मँग्य शंगेशम गंडुनोवुम,
वुछनॉवस तँमिय असलुच वथ ।
करार पनुनुय तँमिस आलुनोवुम ॥
प्रोवुम येलि चोन द्वार ॥

रुमय रेशुनुय आय च़ेय लॅगिनय,
मेच हय तुलख स्वन सपुदिनय ।
अँदरिमि नागु मंज़ु नाग वुज़ुनोवुम ॥
प्रोवुम येलि चोन द्वार ॥

क्याह करु कोत गछु वलनु छस आमुच,

संसॉरुय व्यवेहारचलंगु अँगिनय ।

में फेर पोत, कर्म कर शब्द में प्रोवुम ॥

प्रोवुम येलि चोन द्वार ॥

थवि गोश मॉजय बोज़ म्यॉन्य ज़ॉरी,

लगय पादन पॉर्य पॉरी ।

‘नादानस’ पूजायि अनुवॉर्य द्यावनावुम ॥

प्रोवुम येलि चोन द्वार ॥



5 June 1989

मॉज्य म्यॉनी बोज़तय ज़ारुपारु म्योन

मॉज्य म्यॉनी बोज़तय ज़ारुपारु म्योन ।

ज़ार बूज़िथ करतु रुत व्वन्य चारु म्योन ॥

क्या में राह खोत छस बु फेरान दरबुदर,

छख चु ज़ानुवुन्य ह्यथ बु आमुच क्या हज़र ।

कर अनायथ जल बु यिमु दरबार चोन ॥

दॉद्य जिगरुक्य च़ेय रोस वन बावु कस,

बावनय रोस फट्यम बोस कति रोज़ु मस ।

च़ुय हय सीरु बोज मॉज्य छख गमखार म्योन ॥

त्रोवमुत योद पादि कमलन तल में सर,

वन में तैलि क्याज़ि छुम आमुत युथ मज़र ।

दरदिली हाव लाग व्वसतय कार म्योन ॥

छस बु 'नादान' लुकु गेलुन ज़रु बु क्या,
 छस बु गौरज़ान परनय वन परु बु क्याह।
 सर्व सेदी स्यद चु कर व्यवहार म्योन ॥

3 Dec 1988



ज़ार बोजुम बु वंदय जान

ज़ार बोजुम बु वंदय जान, मे छु पान चेष्ट पुशिरोवमुत।
 वनतम मे यिय छा हान, मे छु बाव चोन ललुनोवमुत ॥
 छुन संसार्य केंह ति लारुन, छुन फलसुय येति प्रारुन।
 कर पानस सुती ज्ञान, छुय गरि गरि वखुनोवमुत ॥
 छुन लोत गोब असि छारुन, बस नाव छु तसुंद गारुन।
 बस सुत्य गौर स्वय छि रोज्ञान, योद कांह आसि वुजुनोवमुत ॥
 करि क्याह तस नेबरिम मल, यस मन आसिय न्यरमल।
 रुत्य कर्म सुय दियि दान, येमि कांह आसि सगुनोवमुत ॥
 रठ पाद बस छुय छोट छल, तस मेलि जाय पादन तल।
 पनुनि लोलु तु प्रेयमय सान, येम्य कांह आसि व्यसुरोवमुत ॥
 बैनिथ 'नादान' वुछ सोरुय, बंद बरुन्यन फुटि तोरुय।
 नेरि नारय मंज सुय स्वन, येम्य मंजुल आसि अल्लरोवमुत ॥



9 Oct 1990

सेदि स्योद मे अज़ सोदा बन्योव

सेदि स्योद मे अज़ सोदा बन्योव ।

अनुग्रेह बन्योम अनुग्रेह बन्योम ॥

व्यसमरु गँछिथ गरि द्रायिसय, आशि सान बरु चोन चायिसय ।
रुफ चोन वुछिथ मन म्योन ब्रम्योम, अनुग्रेह बन्योम अनुग्रेह बन्योम ॥

चोन द्वार अँचिथ अग्यॉन्य ग्यान मंगान, अनुपड वेद्या योत यिथ मंगान ।
बावुक मंदर अज़ पूरु ग्रेज़्योम, अनुग्रेह बन्योम अनुग्रेह बन्योम ॥

आमुत्य सँमिथ योत पनुन्य व्वपर, बजिरा छु वर्तावुन छ्वप्पर ।
दकु लोग दिलस हनि हनि सन्योम, अनुग्रेह बन्योम अनुग्रेह बन्योम ॥

गाहे छर्यर गाहे गशर, कर योखती चलिहेम पूरु अन्यर ।
बानस फिरिथ क्याज़ि परु मे प्योम, अनुग्रेह बन्योम अनुग्रेह बन्योम ॥

यि मे द्युतथम तिय ब्रोंठु कनि थोवमय, यिय मे वोनुथम तिय सारिनुय वोनुमय ।
मँग्य मँग्य द्युतुथ मॉज्य तिय मे चोम, अनुग्रेह बन्योम अनुग्रेह बन्योम ॥

पाद चॉन्य छेलिथ पाद चॉन्य रँटिथ, ख्यनु ख्यनु पनुन पान पॉरॉविथ ।
'नादान' बु छस हर विज़ि व्वन्योम, अनुग्रेह बन्योम अनुग्रेह बन्योम ॥

मे खिरु खंडु थाल बैरिमय मायि चाने

मे खिरु खंडु थाल बैरिमय मायि चाने ।
कबूल करतम पकान छस सायि चाने ॥

सजॉविम बावु सुत्यन थालसुय पोश,
गुलाब पोश छस अथस क्यथ गोछ मा पम्पोश ।
अर्ग पोशि सान लोगुम रायि चाने ॥
कबूल करतम पकान छस सायि चाने ॥

मे ज़ोलुम दूप बैयि अख दुप लोलय,
करुम कृपा बु कूत कर मेनु तोलय ।
बैरिम किशमिश तु बादाम मायि चाने ॥
कबूल करतम पकान छस सायि चाने ॥

थॉविम खिरु खॉस्य थालस अँन्ध अँन्ध ज्वापॉर्य,
दिवान वॅन्य कस बु प्रारान छसुय अँन्यसॉर्य ।
ख्यतम लुकुमा गछय ख्वश ग्रायि चाने ॥
कबूल करतम पकान छस सायि चाने ॥

वुन्युकतॉन्य शुरिनुय माता करान ख्वश,
मे छम अज़ माय गनेमुन्न मय करुम गोश ।
यितम जल जल करय गथ जायि चाने ॥
कबूल करतम पकान छस सायि चाने ॥

वुछान 'नादान' ग्यवान छय नाव चोनुय,

व्यछनावान संगु संगु बावु चोनुय ॥

छि वेंजिमुच बस छि छोट कथ मायि चाने ॥

कबूल करतम पकान छस सायि चाने ॥



7 Oct 2001

थोद मे तुल मय पथर त्राव

थोद मे तुल मय पथर त्राव ।

दयायि हुंद बर मुचुराव ॥

सूजथम च़ेय नादा, तँतिय द्युतथम मे वादा ।

पोत क्याज़ि गव चिकुचाव, दयायि हुंद बर मुचुराव ॥

सनु अंदरी गोमुत, पनु पनु बु छस गौमच़ ।

नम रठ छि फुटवुन्य नाव, दयायि हुंद बर मुचुराव ॥

स्वनु शेरस छम खँसिथ, तपोवनस मंज छम बँसिथ ।

लोलु बानन मे छुम छाव, दयायि हुंद बर मुचुराव ॥

हावुहय दिल मुचुरिथ, अग्यानु ज़ाल वाहराँविथ ।

फोलराव व्वन्य म्योन बाव, दयायि हुंद बर मुचुराव ॥

हौरिथ गरि बु द्रामुच़, छौर्य छौर्य तोर वॉच़मुच़ ।

‘नादान’ करि ठँहराव, दयायि हुंद बर मुचुराव ॥



16 Dec 1987

म्वख्तु ड्यकस चूनि जरान

म्वख्तु ड्यकस चूनि जरान।

लोल बरान माजे ॥

न्यथ प्रबातन तुलुमुल गॅछिथ, लोलु वनुवुन छस करान ॥
अँशिवान्ये खोरु फॅल्य छलान, वुछना करान माजे ॥

बोनि शोहजार छस छावान, पादन तल द्यन गुज़ारान ॥
वारु वारय दिल मुचुरिथ, हाल बावान माजे ॥

बोनि बागस छालु मारान, रावरुन छस मॅशिरावान ॥
मंज़ आंगनस नचुनाह करान, प्यालु बरान माजे ॥

मॉज्य सॅहस प्यठ सवॉरी, हुकुमा करान छय जॉरी ॥
'नादान' बावु पोश सोम्बरान, रसु लागान माजे ॥



Dec 1990

अनुग्रेह करुम द्यवु लागि मे तार

अनुग्रेह करुम द्यवु लागि मे तार ।

शेहलाव नार माँजय ।।

च्युह तु बुंज स्वपनु माया, अहंस कतिय जाया ।

गंड अख छु चोन पायिदार, शेहलाव नार माँजय ।।

छुय गट पछ शेयम रेथ माग, कर पानो अज दीश त्याग ।

म्वठ मुचुराव थफ कथ बकार, शेहलाव नार माँजय ।।

परदु कर खेयनि खँत्य जून, छिय अँन्ध पँछ्य बाँगरान नून ।

चंदुन बनाव शमुशेर दार, शेहलाव नार माँजय ।।

कूद लूब कुती दरन, पानिच दि गरस बरन ।

युथ बनि लोलुक दार, शेहलाव नार माँजय ।।

रगि रगि सनेयम तीर, प्रछु कस क्याह मे तखसीर ।

छुम मरहम वुन्यक्यनस बकार, शेहलाव नार माँजय ।।

‘नादान’ म्याँन्य पहचान, छस ब सायि चोन वखुनान ।

छाँटि रोस्तुय गोछुम तार, शेहलाव नार माँजय ।।



22 Jan. 2003

मौज रवपु भवौनी

गिलि तंबलोव दिल म्योनुय ।
पजि मा तस मॅशरुनये ॥

नवि कुदलु शाहरु (श्रीनगर) धरु हुंजि जायि,
पानु होत जन्म जगत अम्बायि ।
माधव जू धर बब आसुवुनये ॥
पजि मा तस मॅशरुनये ॥० ॥

(1677) जा द्वह जेठु जून पछ पुनिम,
(1777) सपुज ब्रह्मलीन मागु गट पछ सतुम ।
हँत्य वुहरय परम दाम प्रोवुनये ॥
पजि मा तस मॅशरुनये ॥० ॥

ग्वर ओसुय यंदुराज बब चोन,
रँटिथ व्वपुदेश प्रजुल्योव तीज चोन ।
तफ सोदुथ वुस्तरवनये ॥
पजि मा तस मॅशरुनये ॥० ॥

व्वदार कॅरयथख शेश बॅखुत्य सॉरी,
रहस्य व्वपदीशु यलु गॅयि बरु सॉरी ।
कोरथन व्वदार मालिन्य क्रोनये ॥

मादवी थोवुख नाव दुरदाने,
 पेयि ख्वरन यूगी क्रयाये ।
 अदुबुद्ध बालु लीला करुन्ये ॥
 पज़ि मा तस मॅशरुन्ये ॥० ॥

मँज्य मँज्य तिछ दयिगथ हावन,
 बँड्य दुरेन्दर छोपु करनाँविन ।
 कुनि रज़ि ह्योत सारिवुय लमुन्ये ॥
 पज़ि मा तस मॅशरुन्ये ॥० ॥

वासुकोरि कोर मातायि चमत्कार,
 बलु जू धरस वोनून लेख वारु वार ।
 अनुपड बापथुरन ह्योत लेखुन्ये ॥
 पज़ि मा तस मॅशरुन्ये ॥० ॥

व्वतशान मनिगामु ऑस गाव मॉज यिवान,
 भवानि हुंद गडु द्वद सुत्यन बरान ।
 युथ ह्यु अनुग्रेह असि ति करुन्ये ॥
 पज़ि मा तस मॅशरुन्ये ॥० ॥

मनिगाम बास्योम त्युथ शेहजार,
 छेतु कोरनम दज़ुवन नार ।
 युस ओसुम दिलस प्यतरुन्ये ॥
 पज़ि मा तस मॅशरुन्ये ॥० ॥

चाँगिज प्यठ लार क्वलि सौला करान,
 शाह सुल्तानस सुत्य समवाद करान ।
 खाव लाँगिथ आँस क्वलि तरनये ॥
 पज़ि मा तस मॅशरुनये ॥० ॥

बोनि कुलिस तल वुछिम चॉन्य गार,
 ओश जॉर्य गव बास्योम लग्यम वुन्य तार ।
 मनुकुय मल मॉज छलुवनये ॥
 पज़ि मा तस मॅशरुनये ॥० ॥

कुटिया चॉन्य शूब्वुन्य तु शीतल,
 ज़न्म ज़न्मन हुंज़ च़लान गाँगल ।
 छुनु मन यछान तति नेरुनये ॥
 पज़ि मा तस मॅशरुनये ॥० ॥

छाँड्य छाँड्य वॉच़ मनिगाम 'नादान',
 कोनय त्रेशि हॅच़ छिहन त्रेश चावान ।
 यॅहय मॅस्ती छसुय पोशुवन्ये ॥
 पज़ि मा तस मॅशरुनये ॥० ॥



20 April 2006



| | | | |
|----------------------------------|----|----------------------------------|----|
| 1. यवसु जितिन्य दिलस मंज | 36 | 19. कर फवलन सब्रस गुल | 58 |
| 2. दासु बावय करतम पास | 37 | 20. चु ति अकि लटि अँश्य | 59 |
| 3. अर्जनस वनान भगवान | 38 | 21. कोनु जीवु मुहु मंजु चु नेरान | 60 |
| 4. नादान छस कृष्णो चैय | 39 | 22. मानव बे परवाये | 61 |
| 5. हरे कृष्ण लोलु वनुवुन | 40 | 23. श्री रामन गोंड सुम सोथये | 64 |
| 6. व्वलु गीता बोज श्री कृष्णुन्य | 41 | 24. रोज हरि ॐ तत् सत | 66 |
| 7. बु हा चाने अंशुक अंशा छुस | 43 | 25. हरे कृष्ण हरे कृष्ण | 67 |
| 8. द्रोपदी वनान कृष्ण भगवानस | 45 | 26. श्री कृष्ण गोविंद हरे मुरारी | 68 |
| 9. छस राधा नालु दिवान | 46 | 27. आसु ह्यथ में लार मॉज | 70 |
| 10. जसदा मंजुलि ललुवान | 47 | 28. जसदायि हुंद नोट फुटुरोव | 71 |
| 11. पूतना छि मारुन यछान | 48 | 29. कृष्ण लगुयो पादि कमलन | 73 |
| 12. करवुन चु पानु कृष्णो | 49 | 30. दिवान सॉरिसुय सु व्यस्तार | 74 |
| 13. ललुवान छस ख्वनि मंज | 50 | 31. बम बम बोले की जय | 75 |
| 14. अर्दु रातन पाद चॉनी छस | 51 | 32. चंदु चूर छि पनुनी | 76 |
| 15. मे ज़ोनुम बानु ओसुम शानु | 52 | 33. गूरु गूरु करनोवुम | 77 |
| 16. लालो ल्वलि ललुनावथो | 53 | 34. ॐ हरे कृष्ण | 78 |
| 17. चु ओश ह्योर खार फेर | 54 | 35. ज़ार हो वनय यारि जानानय | 80 |
| 18. कर्म बूमी चानेय कॅत्य कॅत्य | 56 | 36. आकाश सायिबान छुम | 81 |

य्वसु जितिन्य दिलस मंज त्रॉवथम

य्वसु जितिन्य दिलस मंज त्रॉवथम ।

अनिगोट चोलुम वथ हॉवथम ॥

वनु कस बु क्या छुम मे गोमुत, ज्यतु लोलकुय छुम मे प्योमुत ।

ॐ ॐ मे बस ख्यनु ख्यनु सौरुम, अनिगोट चोलुम वथ हॉवथम ॥

पेठ्य पेठ्य मे बाव बोज चै कर्योम, जिगरस तीर जन सुय सन्योम ।

वनु कस पतु वेह किथु ज़ोरुम, अनिगोट चोलुम वथ हॉवथम ॥

मानान बु व्वन्य चुय छुख मे मोल, शुरय बाशनुय मतु दितु मे दोल ।

पज़रुच कॅरिथ ज्ञान माज़ छोनुम, अनिगोट चोलुम वथ हॉवथम ॥

न गछ्यम स्वर्ग न मे ब्रह्म लूक, यिनु गछनुक छुम नु कांह ति शूक ।

बस गूपियन ह्युव वेह गोछुम, अनिगोट चोलुम वथ हॉवथम ॥

छम चानि लोलुच बॅड मे तेह, कम गछनु सुत्य छम लगान रेह ।

गूर गूर करान खस्तुदिल दौरुम, अनिगोट चोलुम वथ हॉवथम ॥

प्रकृथ करान कार क्या मे गम, मेय तान्य छुन कैह चोल मे ब्रम ।

‘नादान’ बु छस दाना लोबुम, अनिगोट चोलुम वथ हॉवथम ॥



दासु बावय करतम पास

दासु बावय करतम पास ।

यिकुवटु रास खेलव, यिकुवटु रास खेलव ॥

द्वख स्वखकुय पन अबुसाव,

परु मा थव कांह पनुदाव ।

खुरि रोस डीज पकि रहिरास,

यिकुवटु रास खेलव, यिकुवटु रास खेलव ॥

आरु मंडुल वारु बनाव,

अचुनस मेय किच जाय थाव ।

रंग बैरिथुय बनि इतिहास ॥

यिकुवटु रास खेलव, यिकुवटु रास खेलव ॥० ॥

चौन्य वखुनय कुच मायिनाज,

अर्जनसुय वोनुथ बोड राज ।

अग्यानस कोरथस ग्रास ॥

यिकुवटु रास खेलव, यिकुवटु रास खेलव ॥० ॥

मुरली चानि र्वनि आवाज,

बूजिथ वजान अंदरिम साज ।

होश सौनी छि ख्यवान त्रास ॥

यिकुवटु रास खेलव, यिकुवटु रास खेलव ॥० ॥

नचुन ग्यवुन छय छोट वथ,

सारिनुय बमल सासान लथ ।

अनुभव वेंरिथ गछान ऐहसास ॥

यिकुवटु रास खेलव, यिकुवटु रास खेलव ॥० ॥

यितु वॉलिंज दतु फुटरान,

सोंतु रूदा रोज़ त्रावान ।

वेंहरॉच रूद छेवुम खास ॥

यिकुवटु रास खेलव, यिकुवटु रास खेलव ॥० ॥

मा मंगिमय ज़ांह महलखान,

आरस मंज़ नचि 'नादान' ।

मे च़ेय कुय छुनु वसुवास ॥

यिकुवटु रास खेलव, यिकुवटु रास खेलव ॥० ॥



March 2004

अर्जनस वनान भगवान

अर्जनस वनान भगवान ।

रोज़ दयस कर्म पुशिरान ॥

कर्म यूग मन कोबू गछान,

थ्यर बोज़ सुत्य बनान बोज़वान ।

सतु कर्मच बनान ज़ान,

रोज़ दयस कर्म पुशिरान ॥० ॥

धर्म गव च़्यथ यि मानिय,

दय लरि थॉविथ यि सथ ज़ानिय ।

नेरासख्त यूगच्य बनान ज़ान,

रोज़ दयस कर्म पुशिरान ॥० ॥

कर्म न करुन छुय शाफ,

आवुरान कूद संताप ।

कर्म करुन छु बोड वरदान,

रोज़ दयस कर्म पुशिरान ॥० ॥

युस यिथ्य कर्म करान, हिसाब प्रालब्दु लेखान ।
स्वख द्वख छु तिथु मेलान, रोज़ दयस कर्म पुशिरान ॥० ॥

संकल्प कर्मुक छु असि तान्य, वाति अंद छुनु कॉन्सि तान्य ।
प्रालब्द छु पूथ्य खोलान, रोज़ दयस कर्म पुशिरान ॥० ॥

श्रद्धायि दयि लोल अँलुराव, वेशिवास दयि सुंद थाव ।
बनि अथु रोट 'नादान', रोज़ दयस कर्म पुशिरान ॥० ॥



July 2008

नादान छस कृष्णो च़ेय लगयो

नादान छस कृष्णो च़ेय लगयो ।

लगयो चान्यन हरनु चेशिमन लगयो ॥

नस्ति खंजर आसुवुन च़े तथ लगयो ।

असुवुनि बुधि कथु करनस लगयो ॥

डालि चाने, चालि चाने लगयो ।

गूपियन सुत्य रास गिंदनस लगयो ॥

परु खॉतिरस दिनस चॉनिस लगयो ।

असनस गिंदनस चॉनिस लगयो ॥

अथुरोट करनस चॉनिस लगयो ।

कूद संतस चालनावनस लगयो ॥

गौवन रछिवुनिस रुपस लगयो ।
 मामु कंसस होट चीरनस लगयो ॥
 बादायि सानि दूर करनस लगयो ।
 रुचि वति ब्वद पकनावनस लगयो ॥
 गौवन हुंदि गूरयवानस लगयो ।
 पानस सुत्य नचुनावनस लगयो ॥
 संकल्प सौन्य वुजनावनस लगयो ।
 श्रद्धा सबूर अंद वातुनावनस लगयो ॥
 'नादानस' ग्यानु वथ हावनस लगयो ॥
 नादान छस कृष्णो च़ेय लगयो ।



23 Aug 2008

हरे कृष्ण लोलु वनुवुन

हरे कृष्ण लोलु वनुवुन ।
 सन्योमुत मे बोज़ सनुवुन ॥

त्रौवथस मंज़ गिरुदाबस, आबस छु वुजान नार ।
 वनु क्या मा छु थ्यकुवुन, सन्योमुत मे बोज़ सनुवुन ॥० ॥

बोज़ म्योन क्या मे गुदर्यव, दंदस तल छुनख मा ज़्यव ।
 छम खबर कैह न लारवुन, सन्योमुत मे बोज़ सनुवुन ॥० ॥

वुछ करान काव टाव टाव, तौंति मंज शोछ ह्यथ आव ।
दागि दिल व्वन्य छु बलवुन, सन्योमुत मे बोज सनुवुन ॥० ॥

करवुन चु पानय कार, छोटिस मंज छुम लगान तार ।
नाव म्योन बल्य छु लगवुन, सन्योमुत मे बोज सनुवुन ॥० ॥

चे रोस कुस छुम मे जिमुवार, चे ह्युव कुस मे रख्याकार ।
ख्यनु ख्यनु छुम मे ननुवुन, सन्योमुत मे बोज सनुवुन ॥० ॥

प्रेयमुय छु जगतुक सार, सृष्टि हुंद यि आदार ।
गोछ लोलु मौलु अंद वातुन, सन्योमुत मे बोज सनुवुन ॥० ॥

बर लोल कर पौर्यजान, गछ बूजिथ 'नादान' ।
सरतलि स्वन छु बनवुन, सन्योमुत मे बोज सनुवुन ॥० ॥



Nov 2008

व्वलु गीता बोज श्री कृष्णन्य छि वौनी

व्वलु गीता बोज श्री कृष्णन्य छि वौनी ।

यि छि तनु प्यठ अज तान्य कथ सौनी ॥

अर्जुन शेशि रुप समर्पन कृष्णस करान,

सोरुय अहं पद्यन तल छुस त्रावान ।

गव क्या आत्मा शरीर कृष्ण छु व्यछुनोंनी ॥

व्वलु गीता बोज़ श्री कृष्णन्य छि वॉनी ॥० ॥

स्वरूप स्यद मनुश, सुंद ग्वन छुस व्यछुनावान,

दीह त्याग कॅरिथ मनुश कोत छु वातान ।

नेष्काम सीवायि बंदन छि मकुलोंनी ॥

व्वलु गीता बोज़ श्री कृष्णन्य छि वॉनी ॥० ॥

आत्मा तु ईश सुंदि दिव्य ग्यानु युस कर्म करान,

छुस स्यद्धी तु मुख्य दाम प्रावुनावान ।

युथ ग्यान कर्म यूगुक फल छु आसॉनी ॥

व्वलु गीता बोज़ श्री कृष्णन्य छि वॉनी ॥० ॥

परम पोज़ तु कारनन हुंद कारन छु भगवान,

बख्ती सुत्य महात्मा शरनागती लबान ।

पॉपी छि मायाज़ालस फसॉनी ॥

व्वलु गीता बोज़ श्री कृष्णन्य छि वॉनी ॥० ॥

पनुन असीम तु दिवि रुफ छुस कृष्ण हावान,

छुस भगवान ज़रु ज़ुर बासनावान ।

युथ दर्शुन छु श्वद बख्ती मेलॉनी ॥

व्वलु गीता बोज़ श्री कृष्णन्य छि वॉनी ॥० ॥

त्रेयि किस्मव्य तफ संसारय छि आसान,

यछ रुत कथव, रोज़ अथव सुत्य पलुज़ान ।

ज़ेवि मेछरु बनान छय रुच वॉनी ॥

व्वलु गीता बोज़ श्री कृष्णन्य छि वॉनी ॥० ॥

बोजवुन्य अँस्य अर्जन वनुवुन कृष्ण भगवान,
ग्यानु रुप अमरुत सेद्धी लबि 'नादान' ।
ब्रोंठकुन ति मॉरिफत रोज़ि बॉगरॉनी ॥
व्वलु गीता बोज़ श्री कृष्णुन्य छि वॉनी ॥० ॥



बु हा चाने अशुंक अंशा छुस

July 2007

बु हा चाने अशुंक अंशा छुस,
कुस छुम च़े ह्युव गमखार दयो ।
सोरूय यिय छुम तिय चोनुय छुय ॥
तेलि कमिकुय छुम अमारु दयो ॥
बु हा चाने अशुंक अंशा छुस ॥० ॥

व्वलु च्युह अख यिकुवटु अँस्य बेहमव,
अँस्य पानुवॉन्य सॉरी न्याय अँन्ज़रव ।
व्यछुनिथ वनुविथ यकबार मेल्यम,
बस चोनुय अज़ आंकार दयो ॥
बु हा चाने अशुंक अंशा छुस ॥० ॥

शरमंदु छस गरि गरि मंगुनुय छुम,
अडरोंग जामु वुनि बेयि रंगुनुय छुम ।
ग्वतु वॅरिथुय अथ व्यवहारस मंज़,
गोछ नचुन सोरूय संसारु दयो ॥
बु हा चाने अशुंक अंशा छुस ॥० ॥

कुस बुधिप्युर पहिया पकुनावान,
 युस सेघन तु सादन छु हकुनावान ।
 रटु लाकम पनुनिस अथसुय मंज,
 मरि दिलसुय प्यठ दिलदार दयो ॥
 बु हा चाने अशुक अंशा छुस ॥० ॥

युसु मनि मंज चोनुय दोद ललुवान,
 मंज खीर सागरस ज़ांह छुनु यीरान ।
 कर्मन हुंद फल ख्वश पौट्य चालान,
 गुल्य गंडिथुय बारम्बार दयो ॥
 बु हा चाने अशुक अंशा छुस ॥० ॥

अँस्य चाने हुकमय ज़ाल वोनान,
 अँस्य चाने हुकमय वतु मेनान ।
 पानु सारथी बैनिथ छुख 'नादानस',
 अमि ख्वतु क्याह गछि व्वपकार दयो ॥
 बु हा चाने अशुक अंशा छुस ॥० ॥



24 June 2003

द्रोपदी वनान कृष्णु भगवानस

द्रोपदी वनान कृष्णु भगवानस,

बंद बु गौमुच कौंदखानस ।

कर दया जल सूर कर अग्यानस ॥

बंद बु गौमुच कौंदखानस ॥०॥

अँगु राजुनि ख्वनि मंजु गयस बूद,

सखा बैनिथ सुत्य सुत्य कृष्ण मे रूद ।

पौन्चन वैरिथ कथ रूज जहानस ॥

बंद बु गौमुच कौंदखानस ॥०॥

छस व्वपुरन मंजु दिवान नालय,

कोनु डेंशान छस बो कमि हालय ।

नाद लायान छस दयावानस ॥

बंद बु गौमुच कौंदखानस ॥०॥

मंजु सबाये कौंडिख मे जामु नालय,

परु मा मे पाव म्यानि टाठि नन्दु लालय ।

छस बु खोचान वावु तूफानस ॥

बंद बु गौमुच कौंदखानस ॥०॥

जिठिय सौरी दिवान कोरुवन साथ,

गुठु गोजि छख दिवान पजुरस माथ ।

मे बचौवितव वोनुम कुल्य जहानस ॥

बंद बु गौमुच कौंदखानस ॥०॥

यिमन शोधरन रूद मा वुनिति ह्यन,
कर प्रहार व्वन्य नखु वाल प्रॉन्य रयन ।
छुख चु शाहदत रंगु ज़ाँपनस ॥
बंद बु गोँमुच कौदखानस ॥० ॥

नॅन्य दयिगथ हॉव पानु कृष्णन,
पुशि त्रोवुन द्रोपदी जामन ।
नावु हॉन्ज़ बॅनिथ ति रोज़ 'नादानस' ॥
बंद बु गोँमुच कौदखानस ॥० ॥



Oct 1990

छस राधा नालु दिवान

छस राधा नालु दिवान, बालु चंद्रस प्रारान ।
संग संगय रास खेलान, नेत्रव ओश हारान ॥

योद मजबूरी छु दियुन शाफ, छोट दूरयर करुन क्या पाफ ।
दर संसारय छुम वुछमुत, छु लबान युस छारान ॥

रसु रसय रास खेलान, मस गलि गलि गछि चोन ।
मनु तारि सुत्य साज़ वायान, कृष्ण कृष्ण रोज़ि ग्यवान ॥

मस फिरिथ मनु दूरिस, गछि त्रावुन होन्दरुन ।
पान पुशिरिथ गूपालस, बावु पोश रोज़ि चारान ॥

बासि ठंडक बेयि शेहजार, नार योद आसि दजुवन ।
मॅस्ती मंज नचुना कॅरिथ, रोज़ि मंजुल अँलुरान ॥

मनु पम्पोश रोज़ि फवलवुन, युस असुलिय छु पोशिवुन ।
आँछ मुचुरिथ 'नादान' बॅनिथ, खोरुफॅल्य रोज़ि छलान ॥



Nov 1992

जसदा मंजुलि ललुवान

जसदा मंजुलि ललुवान ।

नुंद बोन कृष्ण भगवान ॥

शंकर जी जूग्य रुफु दॅरिथ, नंदु गोरयुन बर अँचिथ ।

अलख निरंजन परान, नुंद बोन कृष्ण भगवान ॥

जूग्य जूल्य मुचुरिथ वनान, वासुदीव बु ति वुछिहान ।

दर्शुनस छुस बु प्रारान, नुंद बोन कृष्ण भगवान ॥

हेकि मोसुम जूगिस खूचिथ, गोबुर सीनस कुन थोवुन रॅटिथ ।

छि लाल जवहर थाल बरान, नुंद बोन कृष्ण भगवान ॥

दोपुस जूग्य मेथाल कथ बकार, हावुन मे लाल थावुम यिनस वेकार ।

दीदारस दीद म्याँन्य प्रारान, नुंद बोन कृष्ण भगवान ॥

गाशि लाल चूरि थोवुन, गूरय बालुकन ह्योत वदुन ।

म्वछव मंजु सु नीरिथ गछान, नुंद बोन कृष्ण भगवान ॥

कॉन्सि मा दिचुनस नज़र, जोदव किन्य मा करान कॅहर ।

कॅहर जूग्य मा छु मॉत्रान, नुंद बोन कृष्ण भगवान ॥

जूगिस दायि ह्योत इम्तिहान, कँहर वने छुख मा मॉत्रान ।
 फ्वक सुत्य कँहर बु मॉत्रान, नुंद बोन कृष्णु भगवान ॥
 माजि क्वछि मंज कोड न्यबर, ओसुन जूगिस कुन प्यथ नज़र ।
 प्रकूरम पांछ जूग्य नेमिथ दिवान, नुंद बोन कृष्णु भगवान ॥
 दोपुन जूग्य कोताह ज़बर, अकि नज़रि च़लरोवनस मज़र ।
 शंकर रुफ जसुदायि छु हावान, नुंद बोन कृष्णु भगवान ॥



Feb 2007

पूतना छि मारुन यछान

पूतना छि मारुन यछान, नुंद बोन कृष्णु भगवान ।
 छु द्वन माजन हुंद संतान, नुंद बोन कृष्णु भगवान ॥
 नंदु गोरिनि गरि गाह प्यवान, येलि कृष्ण हुरिस मंज बेहान ।
 ज़न सासु बँद्य सिरियि चमकान, नुंद बोन कृष्णु भगवान ॥
 मुबारकस पूतना आय, बेनि म्यॉन्य बु बरस माय ।
 बु दर्शुन निकुन करुन यछान, नुंद बोन कृष्णु भगवान ॥
 पूतनायि ख्वनि मंज त्रावान, जसुदा पनुन संतान ।
 अँदरी ब्वकु तस फवलान, नुंद बोन कृष्णु भगवान ॥
 ल्वति ल्वति लोल बोरनस, ज़हरु ट्यॉड म्वखस त्रोवनस ।
 दामु अकि कृष्णन कँडिस प्रान, नुंद बोन कृष्णु भगवान ॥
 लीखिथ पूतनायि ओस, कृष्णन पानु खुर तस कोस ।
 कोरनस सूर सौरुय अग्यान, नुंद बोन कृष्णु भगवान ॥



करवुन चु पानु कृष्णो

करवुन चु पानु कृष्णो, नाव म्योन बुथि चु लागान ।
थ्यकवुन छु नाव चोनुय, बेयि सुंद चु थ्यकनावान ॥

नव द्वार नॅगुर शूरुथ, जितिन्या पनन्य च़े त्रॉविथ ।
यन्द्रेयन वेशय च़े शीरिथ, कथ छुख मे हानु खारान ॥

प्रछ अख छि कर्म बूमी, हेनुर छु गिरदाबुक ।
खुरय डेंजि कडान चु पानय, मेय अथि चु अबुसावान ॥

कुन्य हेर वतु छि ब्योन ब्योन अटुबोरय थोवुथ मे व्यतरुन ।
छलु छुखं चु पानु लागान ग्रटु ओट पिशिनावान ॥

व्यवहार छस करान सुय सोंबरिथ यिय मे ओनुमुत ।
म्वछि फॅल्य चु पानु बॉगरान, अहंकार मे फब्बुरावान ॥

दूरयर मे योद दज़ान दिल आशि रोस मे पान बासान ।
योद त्रॉव मे आश चॉनी ख्यनु ख्यनु बु कथ च़े छारान ॥

शरमंदु स्यठाह छि 'नादान', आपरनसुय छि केशान ।
शोरान चु पानु तकदीर कथ छुख मे तछिनावान ॥

May 2008

ललवान छस ख्वनि मंज श्र्वन्य चोनुय

ललवान छस ख्वनि मंज श्र्वन्य चोनुय ।

छस मंगुवन्य गरि गरि श्रेह चोनुय ॥

छायि गितिन्य लगयो तिय मे पूशिनय,

ललवान श्र्वन्य चोन गरि गरि मे येछिनय ।

क्युथ म्यूठ ततुर छुम प्यतुरोनुय ॥

छस मंगुवन्य गरि गरि श्रेह चोनुय ॥० ॥

रस म्यूठ दिलसुय सगुनावान,

जन शैहजार ददवनस पिलुनावान ।

राग भय कूद नाशस करुवोनुय ॥

छस मंगुवन्य गरि गरि श्रेह चोनुय ॥० ॥

लोल दयसुय युस बरान करान बैखती,

बैखती रगि थपि सुत्य प्रावि म्वखती ।

शाह रुप दावि लाल रोज़ि जरवोनुय ॥

छस मंगुवन्य गरि गरि श्रेह चोनुय ॥० ॥

पांचने तत्वन हुंज बनेमुच सॉन्य काया,

जगि रुप मेलु गछि मानुन्य माया ।

तुरि तापस सम रोज़ि वुछवोनुय ॥

छस मंगुवन्य गरि गरि श्रेह चोनुय ॥० ॥

जु पडाव छिय दयि वति हुंघ आसान,
 ग्वडुनिच श्रद्धा दौयिम वेशिवासुय चु मान ।
 दयि ग्यानु रुपु म्वख्तु रोज़ि तारवोनुय ॥
 छस मंगुवन्य गरि गरि श्रेह चोनुय ॥० ॥

श्वदी मनुच योतान्यथ छनु सपुदान,
 ग्वर कृपा सम्बव तोतान्य छेनु सपुदान ।
 कँन्ड्य ज़ाल वति हुंद सु रोज़ि च़टवोनुय ॥
 छस मंगुवन्य गरि गरि श्रेह चोनुय ॥० ॥

सुय पानय कार तय बेयि कारदार,
 वुछ दयि संज़ लीला द्यवु लागि तार ।
 कृष्ण कृष्ण रोज़ 'नादान' परुवोनुय ॥
 छस मंगुवन्य गरि गरि श्रेह चोनुय ॥० ॥



Sep 2008

अर्दु रातन पाद चॉनी छस बु ललुवान मंज़ वछस

अर्दु रातन पाद चॉनी छस बु ललुवान मंज़ वछस ।
 द्रावु माने पादुनुय मंज़ कथ बु सनु चॉनिस रोयस ॥
 मेनि कुस सना बोश म्योनुय, होश पादन सुत्य मे छिम ।
 करु बु क्या व्वन्य रॉछ शाहन, मॉछ मदर्यर छुम च्वपॉर्य ॥
 डोंठ फेरिवुय छस छलान पॅद्य, हावु कस अंदरिम बु ज़दुय ।
 हज़ु हवस कमिकुय मे रोज़ेम, छस नचान सोज़स अंदर ॥

मॅच गॉमच छस मायि चाने, आयि बडि मेय मानि कुस ।
 ज्ञानि सुय युस क्राय ललवान, मायि बरिति संजि माये अंदर ॥
 क्या करेम चुरयग्युश मे नेबरिम, छुम अंदरुय पनुनुय मे शोर ।
 खोर शोरु वलनय बु आमच, छस कमन जामन अंदर ॥
 गारान वछि वालिंज चै 'नादान', पाद पनुन्य यिनु दूर करख ।
 छुस तलातुम पाय करुस, यिनु ज्ञायि गछि माये अंदर ॥



25 Aug 2007

मे ज़ोनुम बानु ओसुम शानु दारेम

मे ज़ोनुम बानु ओसुम शानु दारेम ।
 मे च्यूनुम दय छु बोड डोख सुय मे तारेम ॥
 मे थॉविम कॅड्य कॅड्य बादामनुय खॉल्य,
 मे त्रॉवनम अख नज़र कॅर्यनम मे परगॉल्य ।
 च्युहा अख बुथि बिहिथि च़ोल पतु मा लारेम ॥
 मे च्यूनुम दय छु बोड डोख सुय मे तारेम ॥० ॥
 दमा वोनमस ठहर कर बुय वनय कथ,
 बु लगयो चालि चाने छम मे चॉन्य सथ ।
 बु छस गॉमुच मॅच रथि कर मे खारेम ॥
 मे च्यूनुम दय छु बोड डोख सुय मे तारेम ॥० ॥
 मे पुछमस दय च़ु योद वन क्या निशान चोन,
 ड्यकस वुछिमय मे ताज असुवुन दहान चोन ।

ब्रंजिस अँकिसुय चिहिस मंज क्या मे लारेम ॥
 मे च्यूनम दय छु बोड डोख सुय मे तारेम ॥० ॥
 मे दोपुमस लोलसुय दकु दियुन रवा छा,
 तँम्य दोपुनम यिय वोवुथ तिय लोनखुय ना।
 द्युतुम तसला समय यियि पानु गारेम ॥
 मे च्यूनम दय छु बोड डोख सुय मे तारेम ॥० ॥
 मे मोंगमस केंह मा योरय तोरु मोंगनम,
 मे प्रखुट्योव रुत छु च्युह, अथु रोट मे कोरनम।
 मु कुनि 'नादान' सन वन कांह ना दारेम ॥
 मे च्यूनम दय छु बोड डोख सुय मे तारेम ॥० ॥



Aug 2003

लालो ल्वलि ललुनावथो

लालो ल्वलि ललुनावथो।
 जिगुरस मंज बाग सावुथो ॥
 बुथि बुथि बसुकठ ह्युव वुछान, नेत्रव खून किथु छस बु हारान।
 नालु रँटिथ नु ज़ांह त्रावथो, जिगुरस मंज बाग सावुथो ॥

ओगुनिस दोगुन्यार क्याजि गोम, ज़ौव्युल पुरसुय रसु मे गोम।
 योद रूशुख बु मननावथो, जिगुरस मंज बाग सावुथो ॥

रसु रसय मसु मे चोम, नारस नालयमोत कर्योम ।
गाठस व्वन्य मे वातुनावतो, जिगुरस मंज बाग सावुथो ॥

छ्वचिरस ज़ेछर कवु दियुतुथ, कमि ज़न्मुक अंज ह्थि रोदुथ ।
कर्मुक हजर सेज़रावतो, जिगुरस मंज बाग सावुथो ॥

ख्यनु ख्यनु जामन बु ताह दिवान, अनि गटिसुय मंज द्यन बरान ।
बेबि वुशान्येर दोहरावतो, जिगुरस मंज बाग सावुथो ॥

साज़स छुख येलि सोज़ दिवान, त्यंगलन सुत्य च्युह च्युह बरान ।
छस 'नादान' मे शेहलावतो, जिगुरस मंज बाग सावुथो ॥



Aug 2003

चु ओश ह्योरु खार फेर मेयकुन चु वारय

चु ओश ह्योरु खार फेर मेयकुन चु वारय ।
सन्योमुत योद चे छुय सॅन्यराव वारय ॥

छु संसार बॉज़्यगर चेय तम्बलावान,
नाहकय गीर करान बेयि ज़हुर ख्यावान ।
गन्योमुत बाव योद गन्यराव वारय ॥
सन्योमुत योद चे छुय सॅन्यराव वारय ॥०॥

पज़र गव पोज़ मुहब्बत कर चु मेय सुत्य,
गँन्डिथ छय लोल तु बावुचि बैडि मेय सुत्य।

अगर तडुपान च़े दिल तडपाव वारय॥

सन्धोमुत योद च़े छुय सँन्यराव वारय॥०॥

पयान मंज़ कोन्दि सीर मा खाम छि रोज़ान,

च़े सम्बंद प्रोन मेय सुत्य कोनु बोज़ान।

पपनवोल ह्योल छु पोपुराव पान वारय॥

सन्धोमुत योद च़े छुय सँन्यराव वारय॥०॥

च्यतस थव कँम्य चु अनिनख कोत गछुन छुय,

ख्वने ललविथ नाव म्योनय स्वरुन छुय।

अगर व्यतुरान चु दोद व्यतुराव वारय॥

सन्धोमुत योद च़े छुय सँन्यराव वारय॥०॥

वुछिथ कुत्य रंग च़े ज़गतस याद छुयना,

पद्यन लॉरिथ गँयि कँन्ड्य याद छुय ना।

ज़ख्म बलनी हेतिन बैलराव वारय॥

सन्धोमुत योद च़े छुय सँन्यराव वारय॥०॥

कुनुन सीरदार येति छुन बाज़रस मंज़,

कनन नँचु दिथ कौरुख येति नेरनुक संज़।

सम्बोलुथ योद च़े पान सम्बुलाव वारय॥

सन्धोमुत योद च़े छुय सँन्यराव वारय॥०॥

वुछिम गबि छय ख्यवान येति शेरनुय व्वन्य,

करान हाँगलन तु कुकिलन डेरु तिम व्वन्य।

चै पुशरुथ पान योद पुशराव वारय ॥

सन्योमुत योद चै छुय सॅन्यराव वारय ॥० ॥

छु अॅशिफेरि चानि सुत्यन दिल मे रावान,

फुट्टज क्वसु छय चै अंदरी कोनु बावान ।

चै बेयि परखुन छुसय परखाव वारय ॥

सन्योमुत योद चै छुय सॅन्यराव वारय ॥० ॥

गॅजिम नैन्द्र गॅछुम बिंद्र मे गाशिच,

सिवाये चानि कल रोज्यम नु माशिच ।

अॅलुरुथ 'नादानु' मंजुल अॅलुराव वारय ॥

चु ओश ह्योर खारु फेर मेय कुन चु वारय ॥

सन्योमुत योद चै छुय सॅन्यराव वारय ॥० ॥



31 Oct 2004

कर्म बूमी चानेय कॅत्य कॅत्य आछुर गोम

कर्म बूमी चानेय कॅत्य कॅत्य आछुर गोम ।

दोह रात कोरुम कुन दिलस सूर सपद्योम ॥

अमा फॅल्य दिन्नोयम खोनुम सोन मे वाराह,

मे सग त्युथ दिन्नोमस बोरुम लोल वाराह ।

सु दीदन मंज यिथ लॅबिथ दूर सपद्योम ॥

दोह रात कोरुम कुन दिलस सूर सपद्योम ॥० ॥

त्वकुचारु सूरुम बुजर व्वन्य मे आमुत,

व्वशार व्वन्य करुन ला रवा म्यानि जिगरो ।

सुत्य सुत्य रूजिथ मे रूशिथ मनाव्योम ॥

दोह रात कोरुम कुन दिलस सूर सपद्योम ॥० ॥

होखिथ छुम गोमुत तिय लेखिथ यिय मे आस्यम,

मँगिथ मे दियम तिय यिय लानि आस्यम ।

कँरुम पछ मे अकिसुय महालस सहल गोम ॥

दोह रात कोरुम कुन दिलस सूर सपद्योम ॥० ॥

बिदाद छस दिवान या हिसाब छस मंगान बो,

रोंगुम पान पानय मिन्नत कस थवान बो ।

श्रोगुय यिय मे बास्योम द्रोगि खोतु द्रोग प्योम ॥

दोह रात कोरुम कुन दिलस सूर सपद्योम ॥० ॥

करान यिय चु पानय स्वरान दान दानय,

चु बूगान तिय छेख छु बेयि सुंद बहानय ।

अडुल्योक कतन गछ वतन वन मु लारयोम ॥

दोह रात कोरुम कुन दिलस सूर सपद्योम ॥० ॥

दिवान रोजु बारव अँछव दूर सपद्यम,

करान रोजु कीतन योतान्यथ सु तम्बुल्यम ।

दाना पानय 'नादान' बनाव्योम ॥

दोह रात कोरुम कुन दिलस सूर सपद्योम ॥० ॥



14 July 2005

कर फवलन सब्रस गुल ।

कर फवलन सब्रस गुल ।

बुलबुल वनान बुलबुलस ॥

सब्र छुय अख इम्तिहान, कस छुख हान खारान ।

बनि आसान मुशिकिल, बुलबुल वनान बुलबुलस ॥

सब्रुक्य जामु छुनु नॉल्य, दूरिरुक्य बरनु यिनु ऑल्य ।

रुति सातु गछि बेयि म्युल, बुलबुल वनान बुलबुलस ॥

यि पज़र तिय पँज़राव, तस कर वावुजि वाव ।

गव चेर छेनु व्वन्य सुल, बुलबुल वनान बुलबुलस ॥

चालुन रूद तय ताफ, लयि सुत्य बनि इन्साफ ।

मंगनय तोबुरुख तुल, बुलबुल वनान बुलबुलस ॥

छांडुन मु बरय तय दॉर्य, ज़ख्मन मय तुल क्रॉर्य ।

अंदरिय ठाना तुल, बुलबुल वनान बुलबुलस ॥

दमु रोस छुनु यिवान छाव, फिहि रोस कति पकि नाव ।

सु नम रटि, चु तुल हमतुल, बुलबुल वनान बुलबुलस ॥

अवलय चु छख 'नादान', जॉनिथ मु लाग गॉरज़ान ।

नारस मंज़ फवलान गुल, बुलबुल वनान बुलबुलस ॥



15 July 2005

चु ति अकि लटि अँश्य फ्योर त्रावखना

चु ति अकि लटि अँश्य फ्योर त्रावखना ।

कृष्ण लोल ल्वलि ललुनावखना ॥

कृ मतुलब छुनु काँसि केशनावान,

श मतुलब यँन्द्रेय शोमरावान ।

न सर पादन नोमरावखना ॥

कृष्ण लोल ल्वलि ललुनावखना ॥० ॥

यिय मनुसुय तिय ब्रोंठु कनि थवतस,

पतु पानस मंज छुय रोजुन मस ।

मन अनुबव चु ति करनावखना ॥

कृष्ण लोल ल्वलि ललुनावखना ॥० ॥

दिल ऑव्युल रुम गछि दकु सुत्यन,

लोल ज़ख्म बरु चु बस लोल सुत्यन ।

दीदार सुत्य संग दिल बनावखना ॥

कृष्ण लोल ल्वलि ललुनावखना ॥० ॥

सारिनुय धर्मन हुंद सुय मूल आसान,

छुय ग्वडु बरुनुय कुस तूल बासान ।

वछि वॉलिंज मछि खश द्यावखना ॥

कृष्ण लोल ल्वलि ललुनावखना ॥० ॥

लोल ओश हारुन छुय छोट सादन,

गछि मुछि रोजुन गंडन बेयि वादन ।

कृष्ण लोलस दिल तडुपावखना ॥

कृष्ण लोल ल्वलि ललुनावखना ॥० ॥

कति आख कस ज़ाख, योद च़े गछि ऐहसास,

बागि ल्यूखमुत तुलुन छुय त्राव वसुवास ।

पान पनुनुय पानु पॉरावखना ॥

कृष्ण लोल ल्वलि ललुनावखना ॥० ॥

सु छु संसार च़ेक़स फिरुनावान,

वुछ सोरुय दीदव बन 'नादान' ।

पान पुशिरिथ सरु करुनावखना ॥

कृष्ण लोल ल्वलि ललुनावखना ॥० ॥



Nov 2007

कोनु ज़ीवु मुहु मंज़ु चु नेरान

कोनु ज़ीवु मुहु मंज़ु चु नेरान ।

रोज़ बॅख्ती बावु लोल बॉगरान ॥

रथ रुपु शरीर, मन रथी चु ज्ञान,

आत्मा रुपु दय, मंज़ रथस वास करान ।

आत्मा च़ॅलिथ रथ नारु दज्ञान ॥

रोज़ बॅख्ती बावु लोल बॉगरान ॥० ॥

सॉरी धर्म चु हेरुपॉव्य मान,

ह्योर वातुनक्य यिम सादन बनान ।

प्रावि सुय युस नु पौतु छु फेरान ॥

रोज़ बख्ती बावु लोल बाँगरान ॥० ॥

ग्याँनी सुय मनुश बनान,

अशॉन्ती मंज़ युस शांत रोज़ान ।

दयि लोला युस फिरान ॥

रोज़ बख्ती बावु लोल बाँगरान ॥० ॥

दयस कर्म युस पुशिरान,

कांख्या फलचिय छस नु रोज़ान ।

ज़ॉनिथ बनि 'नादान' ॥

रोज़ बख्ती बावु लोल बाँगरान ॥० ॥



March 2007

मानव बे परवाये

मानव बे परवाये, कोरि रोस छेनु कांह जाये ।

तुल्य कुत्य सफर सीताये, कोरि रोस छेनु कांह जाये ॥

आरादना छस करान माजि कुन,

मौजय मे ज़ॉन्य ज़ि न ज़ांह ति ब्योन ।

हम दम मे छुम चोन साये ॥

कोरि रोस छेनु कांह जाये ॥० ॥

किथु पौठय आमुन्न बु सीता ज़न्मस,

छेय खबर प्रज़ॉयि बेयि ज़गतस ।

राजु ज़नकुन मे छुम साये ॥

कोरि रोस छेनु कांह जाये ॥० ॥

पृथ्वी मंज प्रखुटुन छुम बहानय,

बबन माजि रँछिनस दानु दानय ।

पतु ब्रोंठु वुछिनस च्वंजु दाये ॥

कोरि रोस छेनु कांह जाये ॥० ॥

जाग्योव किथु म्योन कर्मु लोन,

राम जी येलि चाव गरय सोन ।

म्युल कोरुम कर्मु लीखाये ॥

कोरि रोस छेनु कांह जाये ॥० ॥

मोल मॉज रूदिम ऑही करान,

पतु पतु द्रायम विगिनि वनवान ।

अयोध्याय कुन वॅरिथ अँस्य द्राये ॥

कोरि रोस छेनु कांह जाये ॥० ॥

शोकय वॉरिव ऑसी नचान,

न्वशि ह्येथ गरु चायि चोर संतान ।

मीठ्य कॅरिहम लोलु माये ॥

कोरि रोस छेनु कांह जाये ॥० ॥

कर्मु फलन कोताह दियुत मे ज़ोर,

वॉरिव बरस दिवनोवनम तोर ।

पँथुर वनुवास सूज्य माताये ॥

कोरि रोस छेनु कांह जाये ॥० ॥

थाँव मिसाल वोरय माजे,
 ख्वश नय आस रामुन ताजे ।
 जूग्य वस्तुर मंगनॉव्य माताये ॥
 कोरि रोस छेनु कांह जाये ॥० ॥

वन द्राव रामजी तु लॅक्ष्मन जी,
 पतु पतु द्रायेस बु जानकी ।
 द्रायेस बु लूकन छाये ॥
 कोरि रोस छेनु कांह जाये ॥० ॥

शेछ ह्यथ गछि कुस ज़नक राज़सय,
 कोरि सूर फोलमुत छुय साज़सय ।
 टॉठ कूर डंडुकवन च़े द्राये ॥
 कोरि रोस छेनु कांह जाये ॥० ॥

माजि शुर्य पनुनी सूज्य वनुवास,
 यिथु पॉठ्य बनोवुन नोवुय इतिहास ।
 दशिरथ ललुवान क्राये ॥
 कोरि रोस छेनु कांह जाये ॥० ॥

छुनु कॉन्सि हुंदुय यि संसार,
 राज़व करुन ह्योत जूग्य व्यवहार ।
 राज़रेन्य बनेयि जूग्य ब्राये ॥
 कोरि रोस छेनु कांह जाये ॥० ॥

सीतायि हुंदि सफर बु वनु कॉत्या,
 अख किताब लागि लेखनस त्यूताह ।

‘नादान’ करान मकुलनपाये ॥

कोरि रोस छेनु कांह जाये ॥०॥



April 1988

श्री रामन गोंड सुम सोथुये

श्री रामन गोंड सुम सोथुये ।

वनि लतिये किथु वोत अंद ॥

छु रामजियस वातुन लंकाये, वति सागरस छुस दियुन तार ।
शरनागथ सागरस वोनुनये, वनि लतिये किथु वोत अंद ॥०॥

बैठिसुय प्यठ सागरस व्यनथ करान, कर व्वापाय त्युथ वथ रोज़ त्रावान ।
असि लंकायि जल छु वातुनये, वनि लतिये किथु वोत अंद ॥०॥

छुस न होडि मंज़ सागर मानान, व्यनथ राम जियिन्य रूद ठुकुरावान ।
नारोनार रामजिय गोवये, वनि लतिये किथु वोत अंद ॥०॥

श्री रामन तुल अथस क्यथ बान, गव सागर लरुज़िथ परेशान ।
दीह शरीर सागरन दोरमुतये, वनि लतिये किथु वोत अंद ॥०॥

नल नील ह्यकन दोपुन सोथ बनाँविथ, ठॅर्य यीरन तिहिँदि अथु त्राँविथ ।
रेशि ओँशिवाद तिमन यि म्यूलमुतये, वनि लतिये किथु वोत अंद ॥०॥

वोन जामवंतन नलु नीलस हाल, सोथ बनॉविव रावुन करोन बेहाल ।
स्वथिकुय संज ह्योत तिमव करुनये, वनि लतिये किथु वोत अंद ॥० ॥

ठैर्य तय बाल पॉनिस त्रॉविख, रूदय पानि प्यठय युथ सोथ बनोवुख ।
राम रामय लॅग्य तिम परुनये, वनि लतिये किथु वोत अंद ॥० ॥

सोथ बन्योव प्वख्तु रामस ख्वश आव,
वानर सेना ति रूज सोथिसुय बरान चाव ।
जल चरव ह्योत दर्शुन करुनये, वनि लतिये किथु वोत अंद ॥० ॥

तैर्य अपोर तति डेरय त्रोवुख, फॅल्य कुल्य कॅट्य सीनु मुचुरोवुख ।
अपुजिस आव पोज मारुनिये, वनि लतिये किथु वोत अंद ॥० ॥

रामेशरुक दर्शुन युस करान, शिवलिंगस तति युस पूजा करान ।
राम दामस सु छु वातुवुनये, वनि लतिये किथु वोत अंद ॥० ॥

सोथिस पॉपी अज छिय मंगान हिसाब,
क्युथ छु रामुन सुम सोथ मंगान छि जवाब ।
यिछ परीख्या छि लूकन किचुये, वनि लतिये किथु वोत अंद ॥० ॥

यि छु सोरुय सु पानु वनुनावान, असि अग्यॉन्यन बॅल्य जहर चावान ।
'नादानस' ति तौश अनुवुनये, वनि लतिये किथु वोत अंद ॥० ॥



रोज़ हरि ॐ तत् सत स्वरान

रोज़ हरि ॐ तत् सत स्वरान ।

गीतायि हुंद छु यिय ग्यान ॥

ॐ छुय दयि सुंद नाव, तत सुत्य पान पौराव ।

सथ रोज़ हर विज़ि ग्यवान, गीतायि हुंद छु यिय ग्यान ॥

कर्म सूज्य तँम्य पानय, नाकारु बेयि जानय ।

रोज़ दयिसुय पुशिरान, गीतायि हुंद छु यिय ग्यान ॥

अंताकरन श्वद थाव, चिहि चिहि दय चेतस थाव ।

मंदर अंदर छु प्रज़लान, गीतायि हुंद छु यिय ग्यान ॥

श्वदि ब्वदि सुत्य गरु नाव, वेशिवास कुय बोर्ड थाव ।

वुछिथुय असुर छु त्रँहरान, गीतायि हुंद छु यिय ग्यान ॥

कर्म कर तु त्याँगी बन, कर्मु त्याग करिय पनु पन ।

शीकियाह छु अमृत बनान, गीतायि हुंद छु यिय ग्यान ॥

मे च़े क्या छु थ्यकुन, मे च़ठ च़े छु रोज़वुन ।

अहंकार छुन तेलि फबान, गीतायि हुंद छु यिय ग्यान ॥

कूद लूब कत्यी दरन, मंज़ु थाव पानिच बरन ।

दुय तु बाव कति रोज़ान, गीतायि हुंद छु यिय ग्यान ॥

कत्यू आख कस चुय ज़ाख, याद थव हँटिस प्यठ श्राख ।

छुन मँरिथय तेलि बेयि ज़ेवान, गीतायि हुंद छु यिय ग्यान ॥

लय कर खय च़ँलुराव, आबाद गछन सँहराव ।

सबुज़ार च़ोपौरय 'नादान', गीतायि हुंद छु यिय ग्यान ॥

हरे कृष्ण हरे कृष्ण, कृष्ण कृष्ण हरे हरे

हरे कृष्ण हरे कृष्ण, कृष्ण कृष्ण हरे हरे ।

हरे राम हरे राम, राम राम हरे हरे ॥

अमि मंत्रु सुत्य मन श्वद सपदान,

प्रानव मंज अम्युक सोज नेरान ।

सु सोजस सुत्यन नचान गरि गरे ॥

युस अम्युक दयान दरि संकट छुस हरान,

पूरु पौठय छुस येन्द्रय शोमरावान ।

महामंत्र परान येमि संसारय तरे ॥

संसारय ग्रुट छुस अनवौरय द्यावान,

ग्यानु रुप बलु ओट पिशिनावान ।

काम कूद मुह लूब लागान छले ॥

कँहवचि खौरिथ छुस पुरखावान,

शेशतुरस स्वनु म्वल छुस खारान ।

न दजान तापय न खोचान तुरे ॥

न दोखु सुत्य व्यसरान न स्वखु व्वट छुय तुलान,

सारिनय सम दयि रुप छु वुछान ।

दय बासान तस पनने गरे ॥

यि छु स्यद मंथुर बडि बोड यन्थुर,

शाह रुप दावि मंज रोज तारान ।

चिहि चिहि 'नादान' ज़ांह ना मरे ॥
 हरे कृष्ण हरे कृष्ण, कृष्ण कृष्ण हरे हरे ।
 हरे राम हरे राम, राम राम हरे हरे ॥

Feb 2006



श्री कृष्ण गोविंद हरे मुरारी

श्री कृष्ण गोविंद हरे मुरारी,
 ही नाथ नारायण वासुदीवा ।
 यि मंथर मनि मंज युस ललनाविय ॥
 सरु करनाविय पनुनुय पान ॥

हा पानु छुख पशान बंदन तु बांदुवन,
 छिनु न्याय ज़ांह अंदान येमि संसार्य ।
 कस सुत्य सम्बंद कर दारि बर बंद ॥
 च्यथ दिथ बासिय बुति मेहमान ॥
 यि मंथर मनि मंज युस ललनाविय ॥
 सरु करनाविय पनुनुय पान ॥

गरि गरि चिह चिह चु च्यतस थवतय,
 कुनिय छुख मांह छुय दौयिम कुन च़े सुत्य ।
 प्रान रुप कुन छुय च़ेय पकुनावान ।
 कोनु शक्ती छे हन प्रज़ुनावान ॥
 यि मंथर मनि मंज युस ललनाविय ॥
 सरु करनाविय पनुनुय पान ॥

दुनिया दौरी करान छख लोसन,
तोसस करान छख व्वपलु गंदि वाव ।
छि तमाशि गॅर्य सुंजि मायायि वॅलिमुत्य ।
बरान चाव बॅल्य हुरनावान पान ॥
यि मंथर मनि मंज युस ललुनाविय ॥
सरु करनाविय पनुनुय पान ॥

मुह रुपु ज़ाल छख पानय वोनान,
पनुन बैयि परुद रोज़ान गँज़रान ।
लोलुक मेछर रोज़ बॉगरावान ॥
पोछर लग्यस पॅर्य पॅर्य शुकरान ॥
यि मंथर मनि मंज युस ललुनाविय ॥
सरु करनाविय पनुनुय पान ॥

टाँगवालि लाकम दि गुर्यन पांचन,
दहन प्यठ हैकख अदु कॅरिथ राज ।
ताजि वॉलिस पुशर सुय मानुन ज़बर ।
पॉन्य पानय बनख थ्यर बोज़वान ॥
यि मंथर मनि मंज युस ललुनाविय ॥
सरु करनाविय पनुनुय पान ॥

ओश कथ हारान कथ प्यठ छख रिवान,
कोनु मानि वदनस छख च़ारान ।
प्रालब्बद पानय छु मनुश लेखान ।
नाहकय कथ हेनु आयि 'नादान' ॥
यि मंथर मनि मंज युस ललुनाविय ॥
सरु करनाविय पनुनुय पान ॥

आसु ह्यथ मँ लार मॉज बोज़ ज़ार म्योन

आसु ह्यथ मँ लार मॉज बोज़ ज़ार म्योन ।

छु नु चूर नंदलाल चोनुये ॥

नंदुबब तु चानि तपुक फल च़े ब्रोंठ कनि ।

दिवकी निश जन्म ह्यथ छुस गोबुर च़े लरिकनि ॥

कृष्णु अवतार ह्यथ यि लीला छि म्यॉनिये ॥॥

युस खेयि दयस चूरि छि तस चूर मानान ।

थँन्य निथु वथ तिहिजं बु गाशिरावान ॥

थनि रुपु लोलु मस छुसख बॉगरनये ॥॥

व्वखुलनु सुत्यन गँडिथ बो थोवथस ।

अनिगटि कुठिस मंज़ बेहनोवथस ॥

वोदार ओसुम करुन कुबेरुन क्रोनये ॥॥

नंगु गूपियन छुस वुस्त्र हरन करान ।

च्वपॉर्य दय छुसख बासुनावान ॥

नाशस अहं करिथ शरनागथ गंज़ुरनये ॥॥

मठ फुटरॉविथ तिमन मँचुरॉविथ ।

वारु वारु दिलन मंज़ ज़ितिन्य तिमन त्रॉविथ ॥

तोशुन तु रोशुन बख्ती लीला आसुवनिये ॥

मुरली तानि गटु गूपियन गाशिरावान ।

अद्वेत बाव बुय छुसख वुजुनावान ॥

अनुग्रह म्यानि सुत्य यिकुवटु रास खेलनये ॥॥

छुस नु खोचुनावान छुसन बु हैछिनावान ।

कंसस पज़रुक ग्यान फिकिरि तारान ॥

ख्वश पौठ्य कालस गछि स्वागत करुनये ॥

जन्मन हुंदय तपीश्वर गूपी त गूरय कॅट्य ।

पनुनि तपके बलु मे नचुनावान ॥

व्यसु तु यार रुपु बॅखुत्य तिमन छुस बु माननये ॥॥

थोद थव गर्दन मु रोज़ छाया पदर्न ।

फर्दन करान बु गूपियन च़टुवाठ ॥

करवुन छु कुसतान्य दिवान नाव म्योनये ॥॥

गूपियन तु गूर्य बालकन मेय सुत्य संबद ।

गछि पोशुन दयस तु बखतिस अंदवंद ॥

मोख्तस मंज़ 'नादान' चून्य आसनये ॥॥



8 Jan 2009

जसदायि हुंद नोट फुटुरोव कृष्णन

अतुर गव माजय मे मय रोशुम ।

बु कर क्या च़े रोस मॉज बर मुचुरुम ॥

लोकुट शुर कथ लगुय तिय मे वनुम ॥॥

ब्वछि होत मे कुस चाव्यम कुसुय ख्याव्यम ।

च़ेय रोस थनि गोलु कुस आपुराव्यम ॥

किथु वनय नोट चोन क्याज़ि फुदुरुम ॥॥

कुसुय कथ बोऽयम कुस बोऽनाव्यम ।
 मोदुर्य बाँथ वैन्य वैन्य कुसुय साव्यम ॥
 कथ प्यठ रूशिख माँज मु तरसावुम ॥॥

चोगुल्य गूपियव खेयि वथ मे रँटुमख ।
 गुजर दिथ गूपियन रुत मे कौँछमख ॥
 तिमन बँखती हुँद ग्वड मे बोरुम ॥॥

छु बँखुत्यन गाहे दय तोशान ।
 गाहे बँखुत्य छिय दयस रोशान ॥
 अनुग्रेह करान गूपियन यि चोन मोसुम ॥

मठ फुटुराँविथ मेय कूद जेवरोव ।
 कूदस अंदर लोलु जुच मे ज़ोतुनौव ॥
 फंब्योमुत अहंकार नाशस कोरुम ॥॥

ओश जुसदा हारान नेमिथ दयस मंगान ।
 हेछिनावतन बालुक छुख दयावान ॥
 'नादान' गंडान गुल्य दयस ओश मु हारुम ।
 लोकुट शुर कथ लगुय तिय मे वनुम ॥



5 Jan 2009

कृष्ण लगुयो पादि कमलन

कृष्ण लगुयो पादि कमलन ।

कृष्ण लगुयो लीलायन ॥

जन्मस यिथ छुन जीव ज्ञानुवुन, कस दारि सुय छु कस दारुन ।

लीखिथ थोवमुत यि प्रालब्दन, कृष्ण लगुयो लीलायन ॥

छुन खबुरय जसदायि माजे, तफ खँत्य बोठ आव जन्मस राजे,

चिहि चिहि छुस न्यमान चरनन, कृष्ण लगुयो लीलायन ॥

व्वदार छुस करुन सोरुय संसार, राख्यसन ह्यथ कंनसस लुरपार ।

आवुरोव कनुस अग्यानन, कृष्ण लगुयो लीलायन ॥

मथरायि प्यठ वोत न्यमंत्रन, साल कोरमुत छुस मामन ।

यियि योर दोपुन येती मारन, कृष्ण लगुयो लीलायन ॥

वोत स्योद कृष्ण राजु दरबार, कथव सुत्य कोरुन माम बेजार ।

मोर कनुस पनुन्य अहंकारन, कृष्ण लगुयो लीलायन ॥

कूदियन द्युत जवाब ज्ञातस, पानु रजि खोत म्यूल खाकस ।

‘नादान’ वोल्मुत लोलन ॥ कृष्ण लगुयो लीलायन ॥



दिवान सॉरिसुय सु पानु व्यस्तार लोलो

दिवान सॉरिसुय सु पानु व्यस्तार लोलो ।

कर परिहेज़, परेहज़ गारु लोलो ॥

सुय ज़मीन सुय पानय आसुमान ।

कवु नाहुकय चारान छुख बुमुकमान ॥

कर छाये पनने लार लोलो ॥ ॥

परिहेज़ गव कहुवचि पान खारुन ।

शोलन मंज़ शैशतर स्वन बनावुन ॥

छे नु रटुने ग्वफु तय गारु लोलो ॥ ॥

सु छु नाशि रोस, ज़ीव सॉरी छि नाशिवान ।

बस बाव ज़ीवसुंद छुय रथि खारान ॥

रुति आमालु छुय लगान तार लोलो ॥ ॥

तस छारान, युस दोद ख्वनि ललुवान ।

युस नु तस सिवा कॉन्से हाल बावान ॥

बंदनव रोस करान छुय कार लोलो ॥ ॥

कामनाये मंग मंग छुय बोड पाप ।

योदु न च्यथ दिख छुय बनान यहोय बोड शाफ ॥

कामनायि रोस मंग दीदार लोलो ॥ ॥

सारिनुय जीवन मंज़ छु कुन भगवान ।

कवु चु ब्योन ब्योन डेंशान छुख 'नादान' ॥

समुद्रष्टी कर व्यवहार लोलो ॥ ॥

कर परिहेज़, परिहेज़गार लोलो ॥ ॥

4 Aug 2008

बम बम बोले की जय

कोनु छुय च़े यिवान आर, शंकर गछ बेदार ।

गछ प्रोखुट बलु बेमार, शंकर गछ बेदार ।।

सौद्यवॉनिस होवुथ रुप, छि मंगान अज़ तथ पूफ ।

क्वबोज़ सुत्य करान तकुरार, शंकर गछ बेदार ।।

यीत्य कात्य पाफ कॅरिमुत्य, छिय नुसा वुनिति हरिमुत्य ।

श्रद्धा सॉन्य थव बरकरार, शंकर गछ बेदार ।।

रोज़न जाय अस्मि अनन्तनाग, सूच्य यूच्य यिवान वॉराग ।

अमरनाथ चॉनी छि गार, शंकर गछ बेदार ।।

शीतल चॉन्य छाया, यि ललुवन्य किछ क्राया ।।

ग्यवान बम बम बोले संसार, शंकर गछ बेदार ।।

गरीब, पसमांदु मॉरिथ, कैह ज़हर च़ेय ख्यॉविथ ।।

हेतिथ इम्तिहान बिसियार, शंकर गछ बेदार ।।

क्या गव यथ वख्तस, चंडाल ज़न बिहिथ तख्तस ।

कुनुन मा कुनि गाटुजार, शंकर गछ बेदार ।।

कॅह गरन मंज़ च़मेमुत्य, कॅह छिनु वुन् हिमेमुत्य ।

पज़रस करान इन्कार, शंकर गछ बेदार ।।

वोहरुथ च़े मायाज़ाल, छेपि लॅग्य ज़गि हुदंय लाल ।

शिवु रुप करान संहार, शंकर गछ बेदार ।।

जंग कथ प्यठ छु 'नादान', छु कुन जीव ह्यौंद मुस्लमान ।

कर रुत्य कर्मव च़ व्यवहार, शंकर गछ बेदार ।।

चंदु चूर छि पनुनी

चंदु चूर छि पनुनी क्वस छि बॅड कथ ।

पोज बस रोज़वुन्य छि दय सुंज सथ ॥

प्रस्थान गरबस मंज जीव त्रौवुथ,

वन न्यबर नीरिथ माजि क्या दियुतुथ ।

छायि गित्य करनस रूदुख मा पथ ॥

क्वस चॉन्य मॉज छय कुस छु चोन मोल,

कर तरिय फिकरि कुस छुय रखनवोल ।

येम्य दिचय शाह लुथ थव तसुंज सथ ॥

कृष्ण छु परातन बैयि सनातन,

छुख कृष्ण पानय तथ राजस सन ।

बर लोल पानुसुय रोज़ मातुहथ ॥

व्यकार चलुराव बॅख्ती सुत्य,

ॐ पन अबुसाव शाह दावि सुत्य ।

लय कर खय चलि वुछ दयिगथ ॥

यिमन पनुन्य छुख वनान छुय नु कांह पनुन,

चिह चिह सातु सातु गछि मनि मंज खनुन ।

तिय खरचख यि जेनख राजुच यि कथ ॥

क्वकर्म तु स्वकर्म छि पानस सुत्य,

छुन टोठ पनुनुय कांह वसान सुत्य ।

न वसान सुत्य सम्सार्य शोहरथ ॥

क्वलि गछि ज्वलि सुत्य स्वखु काँगुर,

गुर्य गंडु रटुनय गछि छलु छांगर ।

प्वख्तु गुरिवोल बनन बँड छि साँपथ ॥

प्वख्तु बनि लाकम योद चारख,

त्यागु अब्यासु योद चूर मारख ।

पुशिराव 'नादान' प्रावख गथ ॥

पोज बस रोजुवन्य छि दयि संज सथ ॥



गूर गूर करनोवुम

मनु मंजलिस गूर गूर करनोवुम ।

शामु स्वंदर अज मे ललुनोवुम ॥

अज असुंद जा दोह, कृष्ण अवतार रुपुक, प्रोन तय परातन छु मूल जगतुक ।

यितु गछि सुत्य मेय शरीर लिथुनोवुम, शामु स्वंदर अज मे ललुनोवुम ॥

रंगुर्य वानुव्य रंग मे करिनम, हीलु कॅरिनम बहानु बिसयार ।

दग अँदुरिम अँदुरिय दवबराँवुम, शामु स्वंदर अज मे ललुनोवुम ॥

दूरि दूरि रूजिथ करिनम आँली, साँली अँज आम दिमस क्या बो ।

अँश्य रुपु म्वखतस हलम दारनोवुम, शामु स्वंदर अज मे ललुनोवुम ॥

ॐ चे मालय हँटि नॉल्य त्रॉव्यमस, मुरली तानव ब मँचुराँवनस ।
गीता पाठु मन हना होमुरोवुम, शामु स्वंदर अज़ मै ललुनोवुम ॥

बुठ नाय मै मुचरिम खबर तस सॉरुय, दिचनम न तॉरय जाय रँटुनस ।
सबुरुक पाठ पतु मन परनोवुम, शामु स्वंदर अज़ मै ललुनोवुम ॥

ततुर यिछि दगि हुंद म्यूठ तय मोदुर, क्या ज़ानि ग्रजुन हवखमुत सँदुर ।
कृष्ण नावु सुत्यन मै दोद बलुरोवुम, शामु स्वंदर अज़ मै ललुनोवुम ॥

कुस बोज़ि हॉर्यसात वननस छे 'नादान', लाकम अशुवन रँटिथ प्रावि सनिदान ।
छूट छूट कँरिथुय मै बोस ल्वचुरोवुम, शामु स्वंदर अज़ मै ललुनोवुम ॥



13 Aug 2009

ॐ हरे कृष्ण

कँह बुछिम चन्दु छेयन्य दरबाज़ार ।
लोबकुन कँह गँज़ुरान गुरस द्वार ॥
कँह क्रकव सुत्यन छांडान तार ।
छोपु छय रवपु सुंज येन्द्रेय मार ॥

यि तार छु स्यठाह कूठ योद फिक्रि तोर ।
पानु अँदरी चु तँछ्य तँछ्य वनि कड मोर ॥
तमि के प्रकाशि सुत्य च़े पशपिय नूर ।
म दरि शैताम निशि मय काँह च़ूर ॥

छि वीदव ग्वन यिहुंघ ग्यवमुत्य ग्वनातीत सुय हरे कृष्णो ।
मन पम्पोशस प्यठ व्यराजमान सु बावातीत हरे कृष्णो ॥

आकारन म्याँन्य रँटमुच्च जाय, सु छुम न्यराकार बैयि न्यरमाय ।
वछस दूरिरूक बु व्यह पालान, पालान वुजगत सु हरे कृष्णो ॥

मे हुर तूलुम या छौन तूलुम, यिय तूलुम तिय बु छस तोलान ।
बु छस तरसान सु कोनु व्यसरान, सु करूणा निदान हरे कृष्णो ॥

बु मेनु तोल छस अहं बॉगरान, सु प्रालब्द म्योन मेय बॉगरान ।
बु त्रेग्वन रुपु स्वबाव ललुवान, सु न्यरग्वन रुपु हरे कृष्णो ॥

बु संसार चक्रस ह्यनु आमुच्च, यितु गछि छुम मे लोलु बोरमुत ।
मे मा च्युनुम मे मंज रोजान, सु अजो अजर हरे कृष्णो ॥

मे द्युतनम तँम्य हंस शूबिदार, छु तडुपावान क्व अम्युक आदार ।
दियम दिव्य ग्यान बु गछु बेदार, हंस हंसस रले कृष्णो ॥

बु पापु पाशन हुर रॉवमुच्च, बु शापु तापव तापुनॉवमुच्च ।
ग्यानुच ज़चि मे शाँताव्यम, कर्म्म वरे हरे कृष्णो ॥

अंदर्य गंड छिम बैरिथ बिसियार, छेनिथ ननि पोज बन्यम दीदार ।
बु आनन्द रोस सु सर्व आनन्द, सु बह्मानन्द हरे कृष्णो ॥

मे छुम अदिकार करून सु पनुनुय, छु तस अदिकार दूर ह्योनय ।
तिजारत पोशवुन 'नादान', छु लीला धर हरे कृष्णो ॥

ज़ार हो वनय यारि जानानय

वन कस छुय न कांह म्योन बोज़ानय ।

ज़ार बो वनय यारि जानानय ।।

क्रालन बानु थुरय प्रालब्द सान,

कैह द्रायि हँल्य कँल्य कैह द्रायि जान ।

लवु दिथ ज़ितिन्य मंज़स त्रॉवनख पानय ।।

त्रेग्वन स्वबाव लोंचि गोंडुन सुत्य,

जाल वोहरुन वलनु आयि तँथ्य सुत्य ।

मुछि गछुनच वति कुत्य द्रायि मस्तानय ।।

पानु बन पनुनि ज़िन्दगी हुंद शिल्पकार,

शत्रुथ त्राव बन पानस पनुन यार ।

गाटुजारुक नूर बखुशिय पानय ।।

संसॉरुय शतुरंज सु खेल खेलुनावान,

फँकीर कांह वँज़ीर काँह शँहनशाह बनान ।

प्यादन कर्मव जाय मेलानय ।।

ज़िन्दगी तौत चायि खोस गलि गलि म्वकुलान,

पँरिवार शक्ती मनुच शक्ती बनान ।

साख्यात दय तँती ख्वश रोज़ानय ।।

चंचल मन बेयिस क्रकव उकुसावान,

दय सुमुरनि मन रुचि वति लगान ।

पॉपी मन न ज़िन्द न छु मरनय दिवानय ।।

संसौर्य कर्म पनुन्य बिगाडान सवारान,
 रूतुय सौंच रूतुय कर लोल बर बहारन ।
 अक्कड़ त्राव अहंकार चॅलि दूर पानय ॥

सीनु छस दारान चान्यन कानन,
 प्रारान बु मीठ्य तय मॅदुरय तानन ।
 येछि पछि थफ वॅरिथ छय 'नादानय' ॥
 ज़ार बो वनय यारि जानानय ॥० ॥

15 July 2009



आकाश सायिबान छुम नुंदबोन

सत च्यत आनंद छु कृष्ण म्योन, आकाश सायिबान छुम नुंदबोन ।
 ख्वश डोल आनंद मय करवोन, आकाश सायिबान छुम नुंदबोन ॥
 रंगु रंगु ज़ोलनम ताल्युन मे बहानव, काचु म्वलु लाल गव मंज़ कानव ।
 बख्शुम बख्चवुन चु दरदिल म्योन, आकाश सायिबान छुम नुंदबोन ॥
 पनु पनु गौमुच रोज़ान मा हेन, कर्मव यितु गछि कति गछि छ्यन ।
 यिय कर सौंतुकाल छु मोसम चोन, आकाश सायिबान छुम नुंदबोन ॥
 ह्यतुकाँर्य हीलु गौर सु द्राम बेगरज़, तस रोस कुस बोज़ि म्योनय अर्ज़ ।
 लॅग्य त्यंगल तलुपत्यन छुख छ्यतु करुवोन, आकाश सायिबान छुम नुंदबोन ॥
 स्येकि सॅहराव चोन दूरेर बासान छुमो, गिलि शिलि हुंद ज़न वथरुन छुमो ।
 सामुम बॅनिथ चु व्वस्तुकार म्योन, आकाश सायिबान छुम नुंदबोन ॥
 माया यि चॉन्य लीला चु रचान, छुम च़िह च़िह तिय फिकरी तरान ।
 'नादान' शरनागत छय चोन, आकाश सायिबान छुम नुंदबोन ॥



मुतफ़रक़ बोग

| | |
|--|----|
| 1. बावु पम्पोश पनुनि माताजी हुंदि नावु | 83 |
| 2. बावु पोश म्यॉनिस पिता जियनि नावु | 84 |
| 3. रुति सातय कूर चॉन्य गॅयि परॉय दर | 85 |
| 4. सोनु कूर | 86 |
| 5. समय युथ बेरहम | 88 |
| 6. सोर संसार छुनु नेरवुनये | 89 |
| 7. पनुनिस पानस साम हेन्य | 90 |
| 8. चाचा नेहरू | 91 |
| 9. पोलिथीन लिफाफन प्यठ | 92 |

बावु पम्पोश पनुनि माताजी हुंदि नावु

सब्रुक्य जामु नॉल्य पानिच्य पॅरिये ।

शूबान नॅरिवारु नॅरिये चॉन्य ॥

बेबि हुंद वुशनेर ज़न छु हॅन्दर्योमुत ।

व्वंदु चोन बासान छु छॅन्दर्योमुत ॥

व्वथि थोद बोलि बेयि म्यॉन्य रंगु चॅरिये ॥॥

बूल्य चॉन्य मीठ कुच शोहजार बॉगरान ।

वनतम सेदि सेदि कस चु छारान ॥

हरे कृष्णनि नावु सॉरिय तॅरिये ॥॥

दयिसुय वुछिमय पोश शेरि लागान ।

शिव शंकरस वुछिम रुप गॅन्ज़रान ॥

साख्यात कृष्ण छुस बासान लरिये ॥॥

सोहबत चॉन्य रुच बॅडुरावान राग ।

रंगु रंगु फवलुमुत छु चोनुय बाग ॥

फुलुयि मॅच्य छावि पोश दारे तु बॅरिये ॥॥

कूद गछि त्रावुन तु पान पॉरावुन ।

वोन कूठ काँसि गछि मॅशिरावुन ॥

दोपुन हू तु हा करनु छुन कॅह नेरुवुनये ॥॥

मजबूरी मंज़ लागुन गछि 'नादान' ।

त्यागुन गछि तैती द्वयतु बाव ॥

वुन्यक्यनुक समा छुन पगाह रोज़वुनुये ॥॥

बावु पोश म्याँनिस पिता जियनि नावु

त्रे मा ड्यूँठथन सु लेम्बि पम्पोश ।

अनान बेहोशनुय ओस होश ॥

वुछुम पूर मे बदल्योमुत ।

कमव गोसव सु आवरोवमुत ॥

किथिस ज़ालस सु ह्यनु आमुत ।

कमव ख्यूबव सु छेन्दरोवमुत ॥

प्रुछुहा प्रॉन्य पॉठ्य कथु तारय ।

मे रुचि रचि फिकरि तारि वारय ।

बु छस तस मॉज सु ज़न अख शुर ।

बु प्रछ क्या तस कड्यम कुस खुर ॥

नु छस कांह गाव, नु छुस टाव टाव ।

नु यादुय तस छु कॉन्सि हुंद नाव ॥

करान नालुमॅत्य छु दयि लोलस ।

स्यठा छुय दूर सु मेनु तोलस ॥

वदान गाहे असान मॅज्य मॅज्य ।

बोलान म्यूठ तु कूठ मॅज्य मॅज्य ॥

छि अथुचे रुखु तति आमचु बॅनिथ ।

हैकि कुस यिमेन कम ज़्यादु खॅनिथ ॥

यसुंघ छिम प्रान छु सुय पोज़ यार ।

हंगुमंगु कस वनय बु रिशतदार ॥

वनान वख बौड छु तेमारदार ।
 दिवान मरहम बलान बेमार ।।
 पुशरमुत टॉठिसुय यारस ।
 सु येथ मंज रॉज्य बु तॅथ्य प्रारस ।।
 करय तिय यिय मे करुनाव्यम ।
 श्वंगस तमि लरि बु येमि साव्यम ।।
 बु छस 'नादान' मे आव जल होश ।
 प्रत्यक्ष ड्यूंटुम सु लैम्बि पम्पोश ।।
 अनान बेहोशनय ओंस होश ।।



14 March 2008

रुति सातय कूर चॉन्य गॅयि परॉय दन

रुति सातय कूर चॉन्य गॅयि परॉय दन ।
 वनु माल्यो क्याजि गोहम पनु पन ।।
 यि छु पतवथ आमुत कडुन्य गरि कूर,
 यिय सूंच सूंच बदनस माजि गोम सूर ।।
 क्या मे द्युतमय वुन्युखतान्य कुस रोदुथ दन ।।
 व्यन्य वुछ दूरि कूर चॉन्य किथु त्रावि पूर्य,
 किथु पकि रॅहदार अथस रटि दोति चूर्य ।
 किथु बनि शाल यस ग़ज़ान ऑस सुह ज़न ।।
 बोज़ व्यन्ती यिनु करख ज़ाह पानस सवाल,
 सुय रछि मेति यस छु सारिनय हुंद दयाल ।
 येम्य सूचिथ पानवॅन्य असि द्युत छ्यन ।।

ओश ह्योर खार मसा तुल ज़ख्मन द्यल,
 व्वुन्य वॉरिव्युक दोद छुम अंदरिम पयल ।
 ऑर्शवाद दिम त्युथ सनु दनु पनु ॥
 कूर रँछिमुच्च ऑसथन हंगस मंज़ गाव,
 अज़ आव रुत दोह तय कँडुन टुख वाव ।
 अंद वॉतिन सीवा म्यॉन्य त्रेन गरन ॥
 लोल बरनुय कोरे छय तपस्या,
 दारिकिन्य दॉरिथ छांडुन्य छय समस्या ।
 बन 'नादान' माल्यो कुनि मौ सन ॥



25 Aug 2002

सोनु कूर

सोनु कूरी येति योर रोज़ बेगम ।
 बस छय व्यनती दयसुय रोज़ सरखम ॥

प्रालब्द ह्यथ बनावनख कॉर्य गरन,
 दोपनय बजा गछ शुक्रानु परन ।
 चोन द्युतनय विज़ि विज़ि आबिज़म ज़म ॥
 यि छु दय सुंद यँछनुय बनावनख कूर,
 गुल रुफ छख हूर छख मा गुलि बम्बूर ।
 युस गुल गुल फेरान छस चशान चम ॥

माजि रुफ रँछिनख दानय दानय,
राजि वँन्य वँन्य पॉजिनख येमि जहानय ।

ड्यकु पूरिनय ज्वापॉर्य फलिनय पम ॥

आश बेयि श्रद्धायि दोशवन्य मतलब कुन,

आश थवनिय छि दय लोल ललुनावुन ।

आशाय सुत्य प्रावान छिय शम दम ॥

साम हैन्य गँयि दानि सुत्य पान मंदुन,

नेरि पानय द्वद तय पौन्य ब्योन ब्योन ।

अमि मन्दनु गछि पानय व्यवहार सम ॥

सम व्यवहार व्वदारुक ग्वडुन्युक पौव,

जीनिथ दपख रूत गव कैह ना रोव ।

युस न येछि व्वदार तस पॉदु गछान ब्रम ॥

संशय सुत्य अजतॉन्य काँसि मा स्वख प्रोव,

कमिय अजतॉन्य ग्यानु रोस पान प्रज्जनौव ।

व्वलसनस ग्यानु सुत्य यिवान आत्मु सयम ॥

शमु दमु सुत्य बनख पानु थ्यर व्वज्जुवान,

रूदस तु तापस दय ठरि रोजान ।

छोटय पॉठ्य लगि तार 'नादान' हर दम ॥

सोनु कूरी येति योर रोज बेगम ॥० ॥



समय युथ बेरहम

समय युथ बेरहम, रोज़्या न रोज़्या ।
रटनबोल नावि नम, सोज़्या न सोज़्या ।।

पेयिय कर पायिसुय व्यतरुन थोवुन दोदु ।
यिमन ज़ख्मन मरहम, सोज़्या न सोज़्या ।।

दज़ान नारय अँन्दुरय युस हँन्दरयोमुत ।
तच़र नारुक यि पयहम, रोज़्या न रोज़्या ।।

पेयस मा याद यिकुवटु ऑस्य आबाद ।
अँकिस मा अख छु कम बोज़्या न बोज़्या ।।

वुन्युखतॉन्य रूद क्या व्वन्य रोज़ि ब्रोंहकुन ।
पगाह सुबहन यि दम रोज़्या न रोज़्या ।।

व्वतलबुजि यथ म्वयस छेनु सुय छु पोज़ म्वय ।
चवान रोज़ त्राव गम सोज़्या न सोज़्या ।।

च़ ह्यतु व्वन्य साज़ वायुन ज़ीरु तारव ।
'नादान' वायान सरगम रोज़्या न रोज़्या ।।

सोर संसार छुन नेरवुनये

सोर संसार छुन नेरवुनये ।

असि छु आँखुर गर गछुनये ॥

किथु नेरुन मंज मुह जालस ।

छुन पानस तान्य मनुशस ॥

गछि बँखती पतु लारुनये ॥ ॥

पालुन शरीर दानय दानय ।

द्युन हिसाब तति आनय आनय ॥

जान गछि होस गंडु रदुनये ॥ ॥

गरु गछुनस च्वचि म्वंजि आसुन्य ।

नून अतुगथ गछि सुत्य आसुन ॥

बस छि आमाल सुत्य असि निनिये ॥

छुयेय इंसाफ कर्मन मेलान ।

स्वर्गुक्य द्वार छिय यलु त्रावान ॥

सतुक व्यचार छुय पोशिवुनये ॥

बाँय बादंव पतु पतु लारान ।

कँह ग्यवान तय कँह ओश त्रावान ॥

गुछि वदुनस मानि चारुनये ॥

कँह वँद्य वँद्य जँद्य बदनस करान ।

कँह गाटुल्य छि अथ ति मानि चारान ॥

‘नादानस’ छु पान पौरुनये ॥

असि छु आँखुर गर गछुनये ॥

पनुनिस पानस साम हैन्य

छिम ख्वर बँड्य मे कुत्या छस बु ज्ञानान ।
गछ्यम रुत खोरुबाना युस आसि चमकान ॥

चलान छिय दूरि वुछिथुय ग्राय म्याँनी ।
खरान बूट वालिनय छय छाय म्याँनी ॥

पंजि खोरुक वुछिथ छेपि छारि गिंदान तिम ।
चलव कोर कुन अँकिस अख छिय वनान तिम ॥

खबुर ऑसिथ मे छम यिछ कमजूरी ।
थदे बोलान बु छस, करान छस आहुजॉरी ॥

मे गोछ रुत खोरुबाना खोरुनय क्युत ।
करान पेश बूटवोल छुम ज़न लोबुम ज्युत ॥

गोछुख ना पेश करुन छिम खोर मे शूबिदार ।
तमिय आयस दुकानस बास्योख मे हुशियार ॥

प्रबातन द्रायि 'नादान' गोस वते शाम ।
हेचुन मा पॉन्य पानस अलुगफु ति ज़ांह साम ॥



चाचा नेहरू

छु लोबमुत भारतन अख लाल ।

थोवुख यस नाव जवाहर लाल ॥

छि माँज कमला तु मोल मोती,

थेवुख असि किच थ्यकुन्य जोती ।

करान विज़ि विज़ि तस रंगु रंगु साल ॥

छि ज़ामुच इन्द्रा तस कूर,

कॅरिन बॅड्य कार ज़न ऑस हूर ।

छि शेत्रन तॅमिय हा दॅजिमुच ताल ॥

ह्यथ गांधी तु बेयि ज़ाकिर,

सितम च़ॉलिख बनेय माँहिर ।

वूनुख अग्रेज़ कडनुक ज़ाल ॥

बोरुय अंग्रेज़वुय जेलस,

गंड मुच़रोवुन ततिय ठेलस ।

कोरुन नोन भारतस क्युथ हाल ॥

बन्योव ग्याँनी सु सफ़रव सुत्य,

वॅनिन कॅन्य शेछ पनुनि कलमय सुत्य ।

द्युतुन इन्द्रायि ह्यस पुर कमाल ॥

बोरुन लोल सारिनुय शुरयन,

छि मुच़रान गंड यिमय खुरयन ।

छु रंग गुलाबकुय बेमिसाल ॥

कॅरिव समुथा बॅरिव च्युन देशस,

वुतुश्य गछि ना दिनुय नेशस ।

छु ह्यौद मुसलिम सिखस कुनय नाल ॥

‘नादान’ क्या छु ह्योन तय द्युन,

चाचा नेहरू छुन मॅशरुन ।

त्रमान देशस छु रंग बदुहाल ॥



14 Nov 1987

पोलिथीन लिफाफन प्यठ

यिय ख्योथ तथ पर शुकरानु बूज़िव ।

यिय छेवुथ रोज़ मेहरबान बूज़िव ॥

हे मानव वुन्युखतान्य आसय बकार,

व्वन्य यिथु पॉठ्य शूबान करुन छा नकार ।

रोट नु दामानु मे रोट गिरेबान बूज़िव ॥

मे बनावनस छि तिम दवॉयात लगान,

ज़हर छिम दिवान छुस ज़हर वापस दिवान ।

अदु वन क्याज़ि लुख हॉरान बूज़िव ॥

छु पज़र यिय बूज़िव छिम स्यठा दूश,

बेमरि फॉलावनस मंज़ कांह ना मे पूश ।

म्योन कार छुय बरुन्य दवाखान बूज़िव ॥

कौम ह्यथ नाल्यन मंज मे जाय अकसर,
 केम्य व्वथान छिम ज़हरुक बनान अम्बर ।
 म्यानि मँह्य द्वापि कौत्या मरान बूज़िव ॥

योदु त्रोवथस चौरिनिस सुत्यन न्यबर,
 द्रामुन कँरिथ गावि नेंगलोवुस अंदर ।
 नेजबॉन्यन खश कौत्य आयि बूज़िव ॥


योद चोन छुय पोज़ म्वयि दामा चे,
 ललुवान कवु चु म्याने नारुच रेह ।
 म्योन वान छुय अपुज़ मयखानु बूज़िव ॥

हा गौफिलो ज़ौलिथ तोति ना मरय,
 सोरुय औंद पोख बो दूशित कँरय ।
 दमु फ्रकु सुत्य कौत्या मे गौल्य बूज़िव ॥

युथ वोनथम त्युथ रँगनोवुम पान,
 कैरी बैग वॅनिथ बडुरोवुथ मे मान ।
 खौल्य मा गँछन कौत्य कारुखान बूज़िव ॥

सोरुवुन छुस चुति सोरख अकि दोह,
 छ्वरु छ्वरु कँरख अंद च़ेति वातुनय दोह ।
 रोज़ुवुन कुन माहिताबान बूज़िव ॥

छुस बु मानान जान गछि कर मे रोखुसथ,
 नतु दोह खोतु दोह बडि म्योन मोहबथ ।
 तस पुशराव बन 'नादान' बूज़िव ॥
 यि ख्योथ तथ रोज़ मेहरबान बूज़िव ॥



| | |
|---|-----|
| 1. गरि पनुनि नेरुन कूठ | 95 |
| 2. व्वंदु हामिक्कन शहीदन हुंद दहिम दोह | 96 |
| 3. चु रूशिख माँज कमेन पोशन | 97 |
| 4. वुछिम गरु वॉल्य पोज़ बेगर बनेमत्य | 98 |
| 5. मै वनतु बायो प्यख कर चु पायस | 100 |
| 6. वरिय २००४ सथ जून चॅन्द्रवार | 101 |
| 7. अनंत नागय छम मै ज्यनु जाय | 103 |
| 8. अँस्य कशीरि हुंघ सॉकीनदर | 105 |
| 9. पतु बजर वन कस असि थ्यकुनुय | 106 |
| 10. अँस्य माजि छुन्य कॅडिथ क्या करव सॉर | 107 |
| 11. कर्म फ्युर | 109 |
| 12. गरु रावुन छु कठयुन | 110 |
| 13. बु कवु द्रायस गरि | 111 |

गरि पनुनि नेरुन कूठ

छु गरि नेरुन कूठ कूत ज्ञानान सॉरी,
करुन्य सहरावसुय मंज सख द्यन गुजारी।
यि ऑस कर दय इलाही अंदुरिय वोथिम द्यल,
गँछिम येति प्रॉन्य हिश बेयि रोजुनुच र्यल॥

मे वनतम क्या ग्वना गव येति बु कँडथस,
बठ्यन बालन बु दावस क्याजि लॉजथस।
चु आदिय बोय मे ओसुख कव अछ वचथ चे मेय कुन,
चे व्वपरन लोल बोरुथ, फिर्यथ शानु मेय कुन॥

जन्म ह्योतुमुत कँशीरे छेय सो द्वन कुन्य मॉज,
रँछिन द्वशवय यिकुवटु दौद गव मा अँहनॉज।
वलाह छुय वन मे त्युथ लोल कँम्य चे बोरनय,
वलाह छुय वन मे त्युथ बाव कँम्य चे कोरनय॥

कथन हुंद शुहुल संवाद कँम्य चे कोरनय,
दगे दौदिस मंज हाल कँम्य चे पुछनय।
गछान बिरियानु छस वख याद पावान,
मे बाँविथ हाल पनुन ऑसुख बेयि मे प्रारान॥

जमानय व्वन्य छु बदल्योमुत कथ प्यठ चे गोय फुर,
कमर कँसिथुय छि अज सॉरी असुलस अनान खुर।
बु ऑसुस तेलि ति 'नादान' अज ति छस तिय,
बु छसना राजदार चॉन्य कवँ गँयिय दुय॥

15 May 2006

व्वंदु हामिक्यन शहीदन हुंद दहिम दोह

कुस जवाब दियि असि बूज़िथ ज़ार ।

पर गगर गरिक्यन छा करान लार ॥

दहिम दोह येलि ओस वोंदहामिक्यन,

सोग मनोव सौरिय ह्यथ शास्त्री जियन ।

बेवजह पुलीसन ह्योत द्युन मार ॥

लूकन दितिख लरि फिर्य फिर्य चोब,

खूच्य नाय कॉन्से नय गोखु आँब ।

खामोश बिहिथ आँस पूर सरकार ॥

फुटराँविहेख नरि जंगु हेरे,

ज़न वछु आसमान कनि सेरे ।

ज़न ओस दज़वुन च्वापॉर्य नार ॥

ज़खमी वातुनाँविख दवाखान,

खखुरि अँड्य वातुनाविख जेलखान ।

दर्दनाक नज़ारु ओस कौरुख येलि प्रहार ॥

बुछितोन फारोक करान डिस्को,

हर सातु सानि विज़ि दोपुन खिसको ।

ज़ानि कर दौद्य सौन्य लागि दिल दार ॥

अथु वॉहरिथ छु मंगान 'नादान',

करि मॉज चारु सोन अँस्य छि प्रारान ।

गरु छुय कशीरि सोन असि गोछ तार ॥

पर गगर गरिक्यन छा करान लार ॥

चु रूशिख माँज कमन पोशन

चु रूशिख माँज कमन पोशन, यिमन ह्यस होश रॉविमुत्य छिय ।
चु बोज़ नालय तिमन लूकन, यिम माँज दावस लॅगिमुत्य छिय ॥

परेशाँनी बु कॅरमुच गीर, वुछान रूज़ुख मे लाँयिख तीर ।
सरे राह साँरी द्रायख सीर, दिवान नालय यिम साँव्यमित्य छिय ॥

मंथ्यानन कडिख जामय, कॅरिख दमफुट्य बूज़िथ पामय ।
चु करतय पाय तिमन ज़न्यन, यिमव कलु ब्वन न्यमुराँव्यमित्य छिय ॥

चे वुछुथ स्यठा चोलुथ कूत, मे बरदाश छुम नु चालनुक यूत ।
चु डाल तलवार तिमन पानय, यिम नु माँज वुनि ति हमेमुत्य छिय ॥

मे यछ पछ छम स्यठाह चाँन्यी, स्यठाह छख चाँन्य अख वाँनी ।
चु परतीथ थव तु वुनि ति प्राँनी, थरु लॅगिथ अँस्य चमेमुत्य छिय ॥

खबर छेनु काँसि क्या छु बनवुन, प्रोखुट रुत माँज छि असि करवुन ।
चु नेर नॅन्य पाँठ्य दिखि दिलास, यिम पथर वुन्यक्यनस पेमुत्य छिय ॥

साँरी ह्यथ त्राव प्यठ दामानु 'नादानस', युथ जवाब ह्येकि दिथ जमानस ।
यिनय फुट शीशि मकानुक यहैय दिल चूर गछान छुय ॥

5 March 1987

वुछिम गरु वॉल्य पोज़ बेगर बनेमुत्य

वुछिम गरु वॉल्य पोज़ बेगर बनेमुत्य ।

डॅख्य रेशिवारि हुंघ छिनु वुनि सनेमुत्य ॥

वुछुम आफताब दिवान गाह प्रॉन्य पॉठ्यी ।

दिवान जून मॉज तसुला प्रॉन्य पॉठ्यी ॥

वुछुम कोस्तूर बोलान दिल करान शाद ।

वुछुम आगुर ग्रज़ान लायान थदि नाद ॥

वुछुम क्वदरत करान कार काँसि प्रछुनुय ।

छि लूकन खस्तु दिल वुछमय मे वनुनय ॥

बु वुछने अज़ द्रायस प्रोन गरबार ।

अँछव वुछम च्वपॉर्य गोमुत छु वथुवार ॥

छि टॉठ ज़्यनु जाय वुछ क्या येति नज़ारय ।

वुछिम च़ोपॉर्य बॅर्य बॅर्य येति मज़ारय ॥

तिमन कबरन जवाब वन क्या होलिंग टच ।

यिमन मंज़ लाल छिय माजे च़टान वछ ॥

चे योद फेरान म्योनुय क्याज़ि कॅडुथस ।

ततिस तापु क्रायि दावस क्याज़ि लॉजिथय ॥

दिचोथम होश प्यमु माह व्यन्य बु पायस ।

कजेयथस सौंचनय तति येति बु ज़ायस ॥

वछस मंज़ याद ललवान गरि बु द्रायस ।

ह्यकथ रूज़ुम नु मंगु क्याह तस ख्वदायस ॥

जिंदय आँसिथ मरनस मा लँजिम तौर ।
मयथ येम्य म्याँन्य वुछ तँम्य दिथ थँवुय दौर ॥
करुन प्योव तछि बछि बैयि जिन्दु छु रोजुन ।
कफारँच बैयि करि कांह गोछ नु बोजुन ॥
मरुन प्योव गरि गरि गौछिथुय जुदौयी ।
जिगरपारव ति कँर असि बेवफौयी ॥
कँडिथ येति चोल कूत वन कस वनय क्याह ।
चे हियुव डोख ब्याख ना म्यूलुम मे तति कांह ॥
ख्वदा बूजिन जंगस व्वन्य जल गँछिन छ्यन ।
चु रोज़ ख्वश मेय रोस योद ज़ोनथुय ब्यन ॥
यि आँस सौरुय ख्वदौयी छुम मे वेशवास ।
मरुय योतान्य रोज़्यम जायि हुंजु आस ॥
चे ब्योन नीरिथ प्रोटुथ पोशकुंय बाग ।
मगर हौरान 'नादान' छ्योन नु कवु राग ॥



July 2003

मे वनतु बायो प्यख कर चु पायस

मे वनतु बायो प्यख कर चु पायस ।
कोरुथ चे आतश युस ओस सायस ॥

नज़र लँजिस मा स्व सॉन्य रेश्यवॉर,
चु गोख बदज़्चन चे ज़ॉजिथन पॉर ।
कॅम्य द्युत चे मशवरु कुसु छुय चे दायस ॥

कति कर दीदार वातु किथु पॉठ्य चार,
दूरयर अलमदार बेबि तुलु नार ।
नुन्द रेश्य सँदुर मॉज्य कति नाद लायस ॥

वदान यि क्याह गव बरनु यिनु कति घाव ,
यिवान शॉन्ती ह्यवान तिहुंद नाव ।

वुछुम बॉगरान नूर बरय येलि बु चायस ॥

मरान छि हतु बॅद्य चु साज़ वायान,
चवान पनुन खून यिना छु शायान ।
बन्योख चु बुथ्य फ्युर सु तोति सायस ॥

गॅयिय कोत स्व माय प्रॉन्य गॅयिय कोत स्व पॅहचान,
न पोज़ चु हिन्दू न छुख पोज़ मुस्लमान ।

लगिय मा हिसाब ज़ाह कवु जंगलन बु चायस ॥

कुनुय छु मन्दिर कुनुय छु अस्थान,
करान छु सुय गथ युस नु ब्यन ज़ानान ।

पजे क्यथ छु मरहम गजे यनु ब चायस ॥

अगर चै न्यूथ तति मे ओंश आराम,
मनुक यि सम्बन्द तती तोति बासान ।
बु तिहिन्द हुकमय टाठि गरि द्रायस ॥

न रोजि जंग ज़ाह न ज़ाह छु रूदमुत,
यिवान कोनु तंग चु कथ फस्योमुत ।
मैं खोच कौन्से सिर्फ ख्वदायस ॥

वनान कैह राम रहीम वनान कैह,
कुनिय छि अख वथ लबुनस वनान कैह ।
रुतुय फल छु कर्मन वुछुम यनु बु ज़ायस ॥

शरन चु वुनि गछ प्यठ त्रॉवि दामान,
बखशान तोबस वनान छय 'नादान' ।
शत शत प्रनाम कॅशीर येति हा बु ज़ायेस ॥
कोरुथ चै आतश युस ओस सायस ॥



19 May 1995

वरिय 2004 सथ जून चॅन्द्रवार

वरिय 2004 सथ जून चॅन्द्रवार ।
गॅयस सॉलॉन्य पॉठ्य वॉचुस बु स्वनुवार ॥
बूजिव अख कूठ सवाला पुछ तति मे गोबुरन ।
चु वन मॉज कोत गछुन छुय कति चु रोजन ॥
बगॉर गगुराय वुजमल, गव रूद जॉरी ।
वसस किथ पॉठ्य ओलिस दित्य मे तॉरी ॥

गॅमित्य दरवाज़ बंद किथु म्यानि बापथ ।
 यछान दिल छुम बु करुहा खतु किताबथ ॥
 लबय गरुचे मै बुजि राजदार आसम ।
 खबर क्या त्युथ ग्वनाह गव बुथ मै फ्युरहम ॥
 बनॉविथ शानु सान ओल दोल मै द्युत हम ।
 बरान कुस आलि रॅस्यत्यन लोल मै वनतम ॥
 वुछुन ददरायि ओश शरमंदु सु गव शुर ।
 पुछोमस क्या मै त्युथ येथ आव युथ खुर ॥
 वनस किथु दूर गॅछिथ छस द्यन गुज़ारान ।
 वनस किथु पॉट्य बु तरसन छस बहारन ॥
 जवॉनी गॅयि मै ज़ाये लोल बॅरिथुय ।
 मै बुजिरस छिम पकान तिम हाय मॅलिथुय ॥
 छ्वपय र्वपु सुज़ छि पानो वन कॅह मु गोबुरस ।
 नाहकय गीर गछि योद सनि सु सनिरस ॥
 बज़ाते ख्वद बु व्वस्ताद थदि लोयमय नाद ।
 मै ब्रोंठुकनि पॉदु गॅयि बेयि ऑठ व्वसताद ॥
 हुकुम अॅछिनुय कोरुख बुथि आयि लोत लोत ।
 मै फ्यूर वुशिनेर रटुहस नाल लोलु होत ॥
 वौनुख त्युथ रोब रोव युस ऑब करान गॉब ।
 वौनुख बुडु छिय शुर्यन खूच्य खूच्य वनान सॉब ॥
 वौनुख बटु रोस अॅस्य गॅयि ज़ायि ज़न हय ।
 द्यतुयनाय त्युथ दाय तु मशवरु काँसि येति हय ॥

बैरिथ शूबान क्या ओस पोशिकुय बाग ।

गुलाब जाफुरय कँडिथ छुन्य रूद यि बोड दाग ॥

लरे बेह प्रॉन्य पॉठ्य असि फोटमुतुय बोस ।

वनोय नाय कँह ति मेनख पानु सोन तोस ॥

द्युतुम तसला मे वेंद्य वेंद्य पानसुय व्वन्य ।

यि ओस दयि सुंद यछुन छ्यनु पानुवन्य गयि ॥

ख्वदाया व्वन्य समय आव कर चु ज्वहदथ ।

जवाब द्युन पेयि नु 'नादानस' हाव दयि गथ ॥



अनंत नागय छम मे ज्यनु जाय

अनंत नागय छम मे ज्यनु जाय ।

कोनय छैन्य गरिच माय वेसिये ॥

गँयि त्रुवाह वँरिय त्रे रयथ तु ऑठ दोह, अज 11 जून मारयोम बैयि छ्वह ।

गरु छुम अचुन लँजिम थथुराय, कोनय छैन्य गरिच माय वेसिये ॥

बागस मंज वुछुम टंग कुल, क्याज़ि आयेख दोपुन वुनि छि सुल ।

येम्य अँनिनख तँमिस बोड आय, कोनय छैन्य गरिच माय वेसिये ॥

गँयि नाय नँन्य तिम लालय, नेरनु विज़ि करि कुंज़ु हवालय ।

तौतान्य दिवाय ऑख मयवतु ताय, कोनय छैन्य गरिच माय वेसिये ॥

चूरि रोजुन बास्योम क्युल, आश ऑसुम द्यवु गछि म्युल ।
क्याज़ि रूदय तिम बेपरवाय, कोनय छैन्य गरिच माय वेसिये ॥

दूरि आदम आव लारान, नालु रँटनुस ओश हारान ।
मायि बँरुच चाँविन चाय, कोनय छैन्य गरिच माय वेसिये ॥

हालातव त्वहि कोरवु र्वखसथ, वारु रूज़िव छम र्वबु सुंज़ सथ ।
यिनय मॉज म्यॉन्य कम गछिय माय, कोनय छैन्य गरिच माय वेसिये ॥

बर मुचरिथ अचु अंदर, वुछि चोलुमुत मा शामु स्वन्दर ।
अचुनय वँछुम दिलस दुबराय, कोनय छैन्य गरिच माय वेसिये ॥

दीवव मे क्युत खँटिथ मा थोव कँह, वँटिथ जल निमु कम गछ्यम वेह ।
अज़ मे पूर ब्यूठ ऑस तिँहज़ राय, कोनय छैन्य गरिच माय वेसिये ॥

मे क्युत लबव थोव मा चूरि कँह, ह्वछिमुचन रगन द्यवु मे मेलि श्रेह ।
छांडान क्या बु मंज़ छस सराय, कोनय छैन्य गरिच माय वेसिये ॥

तिम फोटुव यिन मा वँसिथ, यिम लबुनय तति ऑस्य टँनिथ ।
तिमन ति तोरु वँछ अँश ददुराय, कोनय छैन्य गरिच माय वेसिये ॥

निशान द्युतुमुत ओस पीरन, वाय नन्यर कूत गव सीरन ।
लबु मा वुनि, कुस कर्यम व्यापार, कोनय छैन्य गरिच माय वेसिये ॥

बास्योम रूठमुत महलखान, 'नादानस' छि नॅव करुन्य ज्ञान ।
असुवनि बुथि ललवान क्राय, कोनय छैन्य गरिच माय वेसिये ॥



11 June 2003

अस्य कशीरि हुंघ सॉकीनदर

अस्य कशीरि हुंघ सॉकीनदर ।

फेरान दरबुदर किथु ललवोथ ॥

मचि न्येन्दरे आस्य वुज्जनोंविख, चोमुराँविख गरनुय मंज ।
तिय बूजुम यिना ज़ांह सर, फेरान दरबुदर किथु ललवोथ ॥

कन दॉर्य दॉर्य अस्य मानुनोंविख, दामु दामय अस्य ज़हर चॉविख ।
गलि ज़्यव गॉयि नेरु किथु बर, फेरान दरबुदर किथु ललवोथ ॥

कमि सातय ज़न्मस आयस, रेश्यवारि मंज माजे जायस ।
खरवरि कडिहूख कॉफिर बर, फेरान दरबुदर किथु ललवोथ ॥

ब्रम दिय दिय अस्य मस चॉविख, तारुनोंविख बालु अपोर ।
कनव बूज्य बूज्य वसान ओश जर, फेरान दरबुदर किथु ललवोथ ॥

युस ओसुय कालय गरुवोल, सुय रातस मंज बन्योव डेरुवोल ।
ऑल्य नश्य गव गॉयि नेरु किथु बर, फेरान दरबुदर किथु ललवोथ ॥

चुय तार तय तारनवोल, बटु कॉशुर छा यूत बेमोल ।
 रावन त्योल मे मुरलीदर, फेरान दरबुदर किथु ललवोथ ॥

म्योन सँहलय पानय मा तम्बुल्योख, नाव त्रॉवथ वावस मा ब्रमुर्योख ।
 'नादानस' दज़ान तापव लर, फेरान दरबुदर किथु ललवोथ ॥



June 2001

पतु बजर वन कस असि थ्यकुनुय

पतु बज़र वन कस असि थ्यकुनुय ।

रंगु रंगु समयन दकुनुय लॉग्य ॥

सँमिथुय असितव बूज़िथ अहवाल,

करुवुन कौम हय बन्योव बेहवाल ।

गीर कॅर्य येति अँस्य चेन्दि बेयि बतुनुय ॥

कँह वुछिम डाक्टर कँह इंजीनियर,

कँह लायर तय बेयि प्रोफेसर ।

कोचि कोचि फेरान छिय बेर चखनुय ॥

गरुबार त्रावुन छिनु मँशिरावान,

हावान अख अँकिस छुन कांह वथ ।

किथु ज़ालु नेरुन बुथि किथु पकुनुय ॥

छुम आसुन बासुन बेयि छुम बंगुला,

ऑंगलस ऑंगलस येति द्युन हिसाब ।

बतुनुय हुंद लॉशि गोम लतनुय ॥

जग गव संसार मोहन गव कृष्ण,
 अंताकरनव करोस वरुन ।
 नावि हांज बेंनिथ कोनु बुधि असि पकुनय ॥

ह्यनु आव 'नादान' छ्यनु छुय गोमुत,
 परदेसस मंज अरु आमुत ।
 सरु कर पनुन पान मा सन रंगनुय ॥
 रंगु रंगु समयन दकुनय लॉग्य ॥



March 1990

अँस्यय माजि छुन्य कँडिथ क्या करव सॉर

अँस्यय माजि छुन्य कँडिथ क्या करव सॉर ।

काँप्ति माजि शूबान छा लागुन शॉर ॥

आमुच द्वाटान खोवुर्य तु दछिन्य वथ,

वुछुम कांह नाय तति करान सॉन्य कथ ।

प्रॉटिथ छख निमुच प्रॉन्य रेश्यवॉर ॥

दनुचे ज़बॉन्य मंज करान कौत्या कथ,

ज़ागान अख अँकिस छिख कडान रथ ।

दनु रोस आदुमन छि ज़ागान ब्रॉर ॥

द्वन बायन मंज तुलनय जंग,

छिनु ह्यकान बॉविथ छिख गॉमुत्य रंग ।

लोगमुत दिलन नार बड्योमुत वॉर ॥

युस दीदन मंज़ करान ओस युस जाय,
 बुथिफियुर गव सुय मॅशरन माय ।
 कतरिथ न्यून सुय ज़न न्यून लॉर ॥

जंगलव तु बालव वोनूम अख राज़,
 दमफुट्य ऑस्य कॅरिख बंद कौरुख साज़ ।
 त्रौपरिख सर तय वाँचख मॉर ॥

कुलफ दिथ मकानु वुछ शिकायत करान,
 येतिक्क्य रोज़न वॉल्य द्यन कति बरान ।
 प्रारान वुनि छि जंदु तु फुटमुच दॉर ॥

यि छि सॉरुय फितुरथ सरकारुच,
 वंदु च़लि फबि सथ नव बहारुच ।
 नाद बोज़ि योद सरकार लागि क्या तॉर ॥

बाज़ार बॅर् बॅर्य कोत गयि ग्राख,
 'नादानस' दूरेर हॅटिस प्यठ श्राख ।
 मायि रोस दिलन मंज़ कथ बकार पॉर ॥



20 June 2003

कर्म फ्युर

छ्यनु गॅयि बाँय बंद तु यार ।
छिय वनान अँथ्य करनी ॥

छ्यनु गॅयि मोल तय माँज, छ्यनु गॅयि असि चाटु बोज़ ।
मंज़ आयि तेज़ तलवार, छिय वनान अँथ्य करनी ॥

क्या बुनि बँरिथ बाँचन, अख अँकिस हितन ज़ागन ।
ज़्यव गॅयि शमशेर दार, छिय वनान अँथ्य करनी ॥

बुछि तोख माजि कोरे, छि गिंदान दोरि दोरे ।
व्यवहार ज़न पकान यार, छिय वनान अँथ्य करनी ॥

थर फिरिथ शुस्च बबस माजे, ब्योन बिहिथ ज़न राजे ।
माँज तोति बख़्शान हार, छिय वनान अँथ्य करनी ॥

कर नज़र दून बाचन, छिय मा खुरयन वातन ।
अख अँकिस छि करान लार, छिय वनान अँथ्य करनी ॥

बुथ्य फ्युर तँस्य यंस ज़ाव, पनुन्यन लोग चलेजाव ।
व्वोपरन सुत्य समचार, छिय वनान अँथ्य करनी ॥

ऑशनाव म्वखतय हार, केंह फॅल्य त्वकुट्य केंह बॅड्य ।
छॅकरनु आव बॅनिथ हार, छिय वनान अँथ्य करनी ॥

सीर द्रायि दरबाज़ार, कोत गव प्रौन समुच्चार ।
नंगु गॅयि गंड पायदार, छिय वनान अँथ्य करनी ॥

‘नादान’ दयस पुशराव, स्येदि स्योद पकि तेलि नाव ।
मटि छुस चोनुय बार, छिय वनान अँथ्य करनी ॥



5 Dec 1991

गरु रावुन छु कठ्युन

अख अँकिस येति नाय छुय कांह सनुनुय ।

काँसि मय रॉविन गरु पनुनुय ॥

गरि नीरिथ कूत म्वल रोस बासान,

येलि प्रुछान कांछा गरु कति छुय ।

दकु खेय खेय छय वॉलिंज तनुनुय ॥

कॅशीरि मंज कमाव्योव यि न्यस्फ वाँसे,

सुय बकार आव तति काँसि काँसे ।

गरि कॅडिमुत्य छा गरुवॉल्य बननुय ॥

व्वथु बेठ असि तति द्वन ऑस्य कुनिये,

चाल तय डाल ऑस द्वन कुनिये ।

अख अँकिस ऑस्य तति न्यॉयन सनुनुय ॥

खानव छे गरिच कुंजु चै हवालय,
 निक्क्य शुर्य चॉव्यज्यख चायि प्यालय ।
 न येति कांह त्युथ दरदिल न छुय कांह सनुनय ॥
 गॅयि छलुछांगरु वुनि छम आँफ पानस,
 खसि मा म्वल बेयि 'नादानस' ।
 द्वह पतु द्वह माय छम गरिच गनुनय ॥



8 Oct 1990

बु कवु द्रायस गरि


अमा गव क्या वोलेयस बु कथ प्यठ ।
 क्वसु गांगल गॅयेम सीनस मे क्युथ स्यठ ॥

मचर आमुत मे कवु बाम्बुर मे किछ छम ।
 हचरलद यथ दिलस छाम्बुर मे किछ छम ॥
 मे तछि बछि कूत कर्योम बीठस बु तख्तस ।
 अमा ब्रिसुलाय कॅम्य त्रॉव मे पीठस ॥
 योछुम कॅम्य जाय नियिहेम येति बु ज़ायस ।
 दिचॉयम नालु रछतम युस मे सायस ॥
 कनव बोज़म असन खंगालु च्वापॉर्य ।
 चु चल त्राव टॉठ ज्यनु जाय मॉज लगी पॉर्य ॥
 मे द्युत जल ब्रांदफश ओश गव मे जॉरी ।
 मे कोर क्या कुस गवनाह गव छिन् गरि दिन्व मे लॉरी ॥

बनेय अँस्य कुल्यफकीर दर दर छु फेरुन ।
 मे छम ऑफ वुनि मा दपि कांह छुय नु नेरुन ॥
 निशाान द्युतमुत मे पीरन तुल बु कोत प्यठ ।
 अँमीरी छम मे त्रावन्य निमु मुफलिसी ब कोत प्यठ ॥
 कँरुम तस कुंज हवालु, येम्य नियि मे साँपथ ।
 छुखय पोज़ मर्दिमूमिन यिय छय हकीकथ ॥
 मे ब्वनु कनि कार ड़ेवर ह्यथ मे न्यूहम ।
 बैयिस कारि मंज़ बिहिथ गरु वोल मे न्यूहम ॥
 बुथ्यन प्यठ पचि गँडिथ जवान जूर्य मे बुथि आय ।
 मे वोनमख बाँच मे दियिहूख त्रावय बु ज़्यनु जाय ॥
 बु रँटुहस नालु दोपहम माँजय चु कथ बोज़ ।
 बँडिव तोह्य ताँन्य जोम कुन बाक्यन ति शेछ सोज़ ॥
 वदान छस बुथि मे संगरेशय कँर तस मे ज़ॉरी ।
 मे ब्रोंठ कनि वाँत्य मोटर हेथ बाँच साँरी ॥
 मे फ़टु सुत्य पानु गरु त्रोव फेरुम मे किथु पाँठ्य ।
 बु बचि तेलि योद त्रावु गरु द्रायस बु ख्वश पाँठ्य ॥
 यि ऑस क़ूठ चेनुवन सहरावसुय कुन पँचिस जल ।
 यि कोर गाटुजार तँमी यस 'नादान' छे मुलुतल ॥



6 March 1990



| | |
|------------------------------|-----|
| 1. काक साबु हागल गौंड | 114 |
| 2. भगवान गोपीनाथ बब जी | 115 |
| 3. बबु भगवान | 116 |
| 4. टोठि बखुत्यन बबु भगवान | 117 |
| 5. स्यद पुरुश नंदु बब | 119 |
| 6. आनन्द जी बबस पादि प्रनाम | 120 |
| 7. नंदकीश्वर भगवान | 122 |
| 8. बेयि अकि लटि गोछ मे दीदार | 123 |
| 9. स्वामी कालु बब महाराज | 124 |

काकसाबु हागल गौंड

कॅरितव प्रनाम बारंबार ।

काकसाबु सोन बोड सरदार ॥

यि छु सारिनय हुंद कॅबील क्रोन,

न छु कम म्योन न छु ज़्यादु चोन ।

बस बावुक छुय खॅरीदार ॥

बावुक्य पोश तोह्य लॉगितोस,

चाव तय लोल तोह्य बॅरितोस ।

फल म्यूठ तय बेयि रसदार ॥

हाँगल गौंड छि चॉनी जाय,

वनवोस अँस्य लोलु तु माय ।

तति कुस अज़ कुंज़ु बरदार ॥

अथ खज़ानस छुनु परु ज़ांह प्यवान,

ख्वश दिल विज़ि विज़ि तति बॉगरान ।

सोरान छुनु ज़ांह तिछ छि सरकार ॥

हाल मा प्रुछ वुछितव र्वय,

दोह अज़ ज़्यठु गटुपछ द्वय ।

काकसाबुन बनि अज़ दीदार ॥

‘नादान’ वुछान गाशि लुयन,

गंड मुचुरुस सारिनय खुरयन ।

छुनु लारुवुन कैह दरसंसार ॥

भगवान गोपीनाथ बब जी

बबु भगवानु रोज़ असि अज़ दयाये ।

अँस्य हा आमुत्य छिय माये सान ।।

गँयसा बेदार बो चाने ज़ेरे, शेरे लॉगिमय बावय पोश ।

लोलु अमर्यथ छुय बब बाँगरावान, अँस्य हा आमुत्य छिय माये सान ।।

मोह नेन्दरे अँस्य मँचराँविमुत्य, काम कूधन आवराँविमुत्य ।

अन्धकार छुख चुय गाशिरावान, अँस्य हा आमुत्य छिय माये सान ।।

बुछ मसाँ व्वन्य् साने क्रैयाये रुच वथ हाव कर असि साये ।

न्यरग्वन बब सोन बोड ग्वणवान, अँस्य हा आमुत्य छिय माये सान ।।

पँश छि कर्मव तु शकलि इंसान, पॉन्य पानय अँस्य ज़ाल येरान ।

क्व व्वदि थ्यँर व्वद बनावान, अँस्य हा आमुत्य छिय माये सान ।।

चंचल मन ज़न वावु तूफान, यि छु मदहोस असि छिवुरावान ।

ड्यकु लोन सोनुय छु बब शेरान, अँस्य हा आमुत्य छिय माये सान ।।

कति आयि कोत छु फीरिथ गछुन, किथु म्वकलिय येति ज़्योन तु मरुन ।

ग्यानच असि दितु च पॉरयज़ान, अँस्य हा आमुत्य छिय माये सान ।।

अँस्य मूर्ख तु बेयि 'नादान', पनुनुय पान छिनु प्रज्ञनावान ।
मंज ह्यनुरस छुख तार द्यावान, अँस्य हा आमुत्य छिय माये सान ॥

'संतोश' अनज्ञान ज्ञानन नु द्यान, नेष व्वदिनुय चुय करवुन कल्याण ।
वति डँल्यमुतिनुय वथ चु हावान, अँस्य हा आमुत्य छिय माये सान ॥



बबु भगवान

अज साल कोरुमत छुम बबन ।

अज मालु जरनस तौर छा ॥

अँस्य आयि बरसतल योत दवान, बावस बूज दया बनान ।
वास दयिसुंद बासेम च्वपौर्य, छ्यतु नार गछनुस तौर छा ॥

कृपा तु ओँही अँस्य मंगान, सब्रस श्रद्धायि पोछर मंगान ।
वेकार चँलुरावतम बबा, न्यरवेकार लबुनस तौर छा ॥

पनुनुय पान छुय असि मेथुर, छुय पान पनुनुय असि शेथुर ।
यँन्द्रेय साने बबु शोमुराव, गतु ग्यूर चलुनस तौर छा ॥

होस यलु मे त्रोव पानय खलस, गछि खॉल्य मा बनि क्या डलस ।
गंड रोजि पोश्य तोहि निश छु छल, इंसान बननस तौर छा ॥

लोलच वुजुन्य गोछ मन बनून, सरमायि पथ कुन रोज़ि थ्यकुन ।
जाल बेदनन हुंद छ्यनुराव बबा, गथ प्रावनस तैलि तौर छा ।।

त्याँगिथ अहं लछि गोछ रलून, बस दयि लोलस मंज मतुन ।
'नादान' बु छस थ्यर ब्वद करुम, बोज़वान बनूनस तौर छा ।।



टोठि बखुत्यन बबु भगवान

टोठि बखुत्यन बबु भगवान, रूदस तु तापस छु सायिबान ।
रोज़ि ब्रोंहकुन ति असि मेहरबान, टोठि बॅखुत्यन बबु भगवान ।।

बानुमॅहलु श्रीनगरस मंज, कोर दयिनुय पानु रुत संज ।
सूजुन ग्वनु रोस ग्वनवान, टोठि बॅखुत्यन बबु भगवान ।।

हारु जूनपछि बॉश दोह बोज़, गाश आव लुयन च्वपॉर्य वज्योव सोज़ ।
जूत्य बासेय च्वपॉर्य चमुकान, टोठि बॅखुत्यन बबु भगवान ।।

बुडि बबु चोन लॅख्यमन बान, वॅज़ीर कज़ारतुक ओसुस स्थान ।
ज्यनु बबु चै नारायन बान, टोठि बॅखुत्यन बबु भगवान ।।

प्रसाद जुव पॉरिम कूत बागिवान, रॉगिन्या क्वछि तस तुलुमुलि बरान ।
दीवी मायि हारुमलि गुण जून बावान, टोठि बॅखुत्यन बबु भगवान ।।

बॉय चॉन्य गूवेंद जियालाल, बेनि चानि जानकी तु दिवमाल ।
तीज बबु सुंद छु नूरि नूरान, टोठि बॅखुत्यन बबु भगवान ॥

नॉल्य फ्यरन कलस सफेद दस्तार, नॉरिल ब्रोंठ कनि क्या छु शूबिदार ।
फेकिस प्यठ च़े शाल क्या छु प्रज़लान, टोठि बॅखुत्यन बबु भगवान ॥

ऑठुमि जमॉन्न तॉन्य च़े पोरमुत, संसकृत शारदा हिन्दी कति च़े हैछमुत ।
कठंस्त मन्थर च़े सॉरेय आसान, टोठि बॅखुत्यन बबु भगवान ॥

बबु येमि विजि ओस दुकानदार, कोनु तेलि अँस्य अँस्य खरीदार ।
परमानु व्रकरि हुंद मेलिहे ग्यान, टोठि बॅखुत्यन बबु भगवान ॥

वरतावान बबु गीता ग्यान, ज़ेवि सुत्य ग्रन्थ छुख व्यछुनान ।
रूगियन ब्रंज़िस मंज़ बलुरान, टोठि बॅखुत्यन बबु भगवान ॥

बेहान साद मंडेजन मंज़ अखसर, स्वरूपु स्यद प्वरुश युथ यूगीशर ।
कथु कम करान मस रोज़ान, टोठि बॅखुत्यन बबु भगवान ॥

शान्त स्वरूप ल्वलि ललुवान नार, सतोवुह वुहरिस गव साख्यात कार ।
तमॉकुकि कशि रूद यूग सादान, टोठि बॅखुत्यन बबु भगवान ॥

पुछु बॅखुत्य बबुस कुस ग्वर चोन, दोपुन मनशस ग्वर छु आत्मा पनुन ।
वथ भगवत गीता छि माशिरान, टोठि बॅखुत्यन बबु भगवान ॥

श्रद्धा वेशिवासु रोस छु बेहतर मरुन, कर्म तु ग्रहसत पजि नु ज़ांह त्यागुन ।
फल त्याग, ज़न्म रथि छु खारान, टोठि बॅखुत्यन बबु भगवान ॥

जेठ ज़ूनपछि द्वयि प्रोवुन परमदाम, गव बॅखुत्यन मंदिन्यन शाम ।
'नादान' यथ सरायि मेहमान, टोठि बॅखुत्यन बबु भगवान ॥



स्यद पुरुश नंदु बब

पोरशियार हब्बुकदुलकि ताजदारो ।

नंदुमति सूफी गाशदारो ॥

ज्यनु माँज यँम्बरज़ल, मोल शंकर चोन,

श्वम्बु साहेब कूँछ बरादर चोन ।

उर्दू, अंग्रीज़ फारसिकि ज़ॉन्यकारो ॥

लुख छिय हठी बेयि ज़िदी बबस वनान,

परिपूर्ण रिंद दयस सुत्य कथु करान ।

बेमिसाल आसुवुनि कलमकारो ॥

बालु पानु बॅरुथ क्वछि ठोकुर कोलस,

लोलस दयुतुथस सँग लोलु सुत्य ।

नुनर गांदरबलुकि सीवाकारो ॥

बारोब म्वख चोन नूरु सुत्य चमुकान,

स्यद सपुद यूग च़े प्वखरिबलु अस्थान ।

दीवी आंगन गव च़े साख्यातकारो ॥

अज पोह गटुपछि देंहम चोन ज़न्मघन,

दर्शुन कॅरिथ घव नखु वालु रयन ।

पादन दिमय मीठ्य म्यानि राजदारो ॥

अथु रोट सपुदान खुरय तु वर छि नेरान,

तंगुदँस्ती मंगुनय छि दूर सपुदान ।

रुहॉनी पैजि हुंघ थदि मीनारो ॥

अथस क्यथ डंडु चोन पाप शाप गालुवुन,

दिवान ज़िन्दुगी युस आसि मरुवुन ।

बेसहायेन हुंदि कुंजु बरदारो ॥

सु कोताह बागिवान यस विज़ि विज़ि हेस दिवान,

‘नादानस’ ति छिव अथु प्यठ थवान ।

ईश्वर स्वरूप बबु बडि सलाहकारो ॥



आनन्द जी बबस पादि प्रणाम

गॅरीब नवाज़ टाठि बबु दयावानो ।

छुख मेहरबानो रोज़ सायस ॥

नाव छुय आनन्द, आनंद दाता,

सरस्वती माता चॉन्य ज़्यनु मॉज्य ।

रागवरामुन्य पांचिमि जानानो ॥

ऑशिदु गटुपछि बॉश्य आथवारे,
 दयि टॉठ्य ह्योत ज़न्म विलुगाम वारे ।
 गाह तीज़ुक प्यव गामस तीज़वानो ॥
 बॉय पांछ बेन्यन द्वन हुंदि बायो,
 छुख बोड सरमायि येमि संसॉर्य ।
 ब्रमुचॉर्य व्रतस मंज़ बॉगरुथ ग्यानो ॥
 ग्वर चोन नंदुकीश्वर पानु भगवान,
 वास ओस ठोकुर कुठिस मंज़ करान ।
 बालक रुपु ओस बूज़न करानो ॥
 ग्वनुवान ऑसिथ ग्वनव निशि चुय दूर,
 करान अकि नज़रि मद चकनाचूर ।
 बयस बनान ओस ज़य बलवानो ॥
 श्रद्धा तु वेशवास ऑस्य चॉन्य वॉनी,
 स्वर नाव दयि सुंद बॉतीनी ।
 दयस सुत्य सबंद ते व्यछुनुथ पानो ॥
 सीवा बाव त्याग बैयि व्यवहार चोन,
 वुछिथुय गलान ओस चोन तय म्योन ।
 पथर पैमुत्यन थोद तुलवन्य कलमदानो ॥
 मॅच्य ड्यकु बॅड आस छुम गछान कनुनुय,
 'नादान' वनुनुय मंज़ दिवान नाद ।
 रुच नज़र थदि प्यठ कर बोज़वानो ॥



नंदकीश्वर भगवान

सुंबलु आव बैयि रोज़ुनि नंदकीश्वर ।

येति ननिवानु लूकव बनोव मंदर ॥

तति बायन बेन्यन वुछुम अँछन मंज़ ओश,

नालु रँटिख कथ करव योरु अँस्य गोश ।

छांडान आँस्य सुंबलुक्य साँकीनदर ॥

नोन छु रोज़ान येतिक्यन दिलुनय मंज़,

बटु वापस अनुनुक छि करान संज़ ।

शूब छेनु तिमव रोस येतिक्य छि बसकीनदर ॥

छ्वकुलद दिलव व्वन्य मै निश पनुन्य हाल,

अथ गामस रॉव्यमुत्य छि कम कम लाल ।

तखसीरु रोस मॉरिख कँडिख खखुरि बरु ॥

बोनि कुलिसुय तलु छु नंदुकीश्वरुन निवास,

बटु चँलिथुय लिंगस कोरुख तति त्रास ।

नागन द्युत दर्शुन तुजिनुख थर ॥

हवुनस मंज़ व्वन्य तिम वेशवास थवान,

टेक्य नॉरिवन ह्यथ छि गरु कुन दोरान ।

करि अथु रोट दोपुख असि नंदुकीश्वर ॥

फोजिकि मदतु सुत्य थॉवुख इस्तादु आस,

व्वन्य छि खोचान दपान येति छु दयि सुंद वास ।

दिल फुटिमत्यन कासान छुय मर मर ॥

तति वुछुमय प्रोन ह्यु बेयि इतिहाद,
 बोय बोज्ञान बाँयिस बेयि फॅरियाद ।
 'नादान' मंगान अनुग्रेह ही जटादर ॥



बेयि अकि लटि गोछ मे दीदार

बेयि अकि लटि गोछ मे दीदार ।
 कर गंड प्रोन वारु पायिदार ॥

कर्मव पुनन्यव यि बूगुन मे ओसुम,
 सुत्य सुत्य बबन मे खुर कोसुम ।
 सत् संगु कॅरनस बु बेदार ॥

अग्यानु गटि होवनम मे गाश,
 बेसब्री हुंद चोटन मे पाश ।
 दय दोपुन छु कार बेयि कार दार ॥

ह्येच ओसिथ मॅच मे वोननम,
 सोरुय अहं लछि त्रौवनम ।
 विजि विजि बन्योव तीमारदार ॥

कथि कथि मंज दिवान ओस ग्यान,
 फिकिरि यस तौर सु ओस कर्मवान ।
 हेछिनाँवनस सम व्यवहार ॥

नज़रि आदम छु सूरबोन वुडान,
गरि गरि ओस चेनुवन दिवान ।
दूरि खोचान ओस अहंकार ।।

निशि थवुहान योद चु भगवान,
गलि कर्मव पनुन्यव शेतान ।
लगि पानय मंगुनय तार ।।

असुवनि बुथि मेछि कथु करान,
बावनय वेगुन दूर सपुदान ।
दँदिमतस ओस बनान सब्ज़ार ।।

रुत्य कर्मव किन्य 'नादान',
त्रेति म्यूलुय दौयिम पायदान ।
शम दम दौपुन कर व्यवहार ।।



स्वामी क़ालु बब महाराज

सामि क़ालु बब बख़ुत्यन वारय ।
यियि रोज़न्य कर दुबारय ।।

फाल्गन पुणिम क़ालु गोंड कवपवारे,
संसार च़ेन्दरस गोंयि स्वनु लबु पारे ।

कुल्य कँट्य फ़ैल्य आव नोव बहारय ।।

पोथरस शोबुन नाव भगवान दास,
बास्योव यस च्वपॉर्य दयि सुंद वास ।
बुछ्य बखुत्यव नॅन्य चमत्कारय ॥

गव प्रसन्न गवर नन्दुलाल स्वॉमी,
नाव क्वालु बब दियुतुन मस्तॉनी ।
प्वरख्तु यूगी बन्योव यकुबारय ॥

क्वालु रुप ब्रह्मा पॉदु ज्जीवन करान,
अडुगॅर्य मडुगॅर्यन छु बब तराशान ।
वतुहावुक स्यद्यन बेकसन सहारय ॥

‘क’ कतर्व्य, रुप मतलब ‘र’,
‘आ’ गव आगु लय मतलब ‘ल’ ।
बब गव बखुत्यन हुंद सहारय ॥

आगु संज लय कतर्व्य रुफ करनावान,
पज़रुक मीनार युस अनुबावान ।
रुत काँछान करान रुत चारय ॥

स्यज़र, पज़र, श्वज़र चॉन्य वॉनी,
यॅहय बखुत्यन छि बॅड मेहरबॉनी ।
ग्यानु शॉस्त्र गलान अहंकारय ॥

छु पोछर सत्संग दर्मस दिवान ।,
परूज़न्मुक्क्य पाप छु ध्यान गालान ।
सम व्यवहार लबान ज्जीव तारय ॥

नमुतस मंज़ येलि छकरनु बटु आय,
नारन थोद ब्वछि नार वोनुख बेवाय ।
हलुशीरी बन्योव बबन नारय ॥

चर्सु चिलिम ऑस्य तिम बरुनावान,
 च्यथ केंह दाम बखुत्यन पिलुनावान ।
 मॅस्ती मंज करान व्वपुकारय ॥

वुछुन माजे पतु ब्रोठ न्यश घेन,
 नखु वॉलिन सीवायि सुत्य रेयन ।
 ह्योत तोत मोत बन्योव गाशुदारय ॥

कथनुय मंज फिकरि ओस तारान,
 लोलु बावय दय युस छारान ।
 व्यगनु रोस्तुय करान सु दीदारय ॥

जीवु पुशराव दीवी तु बबस,
 फिक्र गम त्राव, ह्यतु कॉम सब्रस ।
 वन्द त्रलिथुय यियि नोव बहारय ॥

ग्वडु क्वाल गोंड पतु टिक्कर थानस,
 वॅन्य बु दिमुयो क्षीर भवॉन्य अस्थानस ।
 वतु मेन्यम तपॉर्य ल्वकुचारय ॥

ऑशदि गटु पछि च्वदुश द्रायि सॉलस,
 गथ प्रावुख लथ दिथ ज़गि मॉलस ।
 न्यून बखुत्यन दिलकुय करारय ॥

वेनुकोरि, नमतुहाल, गडी, जेमि आश्रम चॉन्य,
 बासवुन च्वपॉर्य आशा छम चॉन्य ।
 कड वर खुरेन 'नादानस' वारय ॥





- | | |
|-------------------------------------|-----|
| 1. श्रद्धांजली श्री प्रेयमनाथ भट्ट | 128 |
| 2. श्रद्धांजली श्री प्यारे लाल हंडू | 129 |
| 3. श्रद्धांजली श्री राम कृष्ण भारती | 131 |

श्रद्धांजलि श्री प्रेयमनाथ बट्ट अडवोकेट अन्नताग

कॅमिय ह्वखुनोवुय ग्रज़ुवन सॅदुर ।
यलु गॅयि छेनिथ आयि मोख्त लॅदुर ॥

प्रेयम गव लोल, नाथ गव आगुर,
वर्तुख लोल ज़ेवि म्यूठ तय मोदुर ।
मुस्लमान हैंदिस करान कुन्य नज़र ॥

प्रेम ज़गुतुक सार ज़गि हुंद आदार,
बनान गंड प्रेयमय छुय पायिदार ।
शेथुर दुयतु रागुक प्रेयमुय कॅहर ॥

मॉज जानकी मोल लॅखिमन जी,
संतान तिहुंद ओस कर्म यूगी ।
ज़िदय शाम गोख ऑसिथ सॅहर ॥

ग्वनव सुत्य बॅरिथ ओस ग्वनव निशि दूर,
पथ कुन गव त्रॉविथ कान्तु हिश हूर ।
मॅशरुन स्यठाह कूठ सुय अख पॅहर ॥

पोथुर ज़ु कोमार जी, कशमीरी लाल,
वीनु कूर छस करान रंगु रंगु साल ।
युथ ह्यु डोख कडुनस कॅमिय त्रॉव मोहर ॥

अन्नतनागुक लाल गव गोलि हुंद शिकार,
 अँपज्य त्रोंव पथर पज़रुक मीनार ।
 अकि टासु पथर प्यव कोमुक पँथर ॥
 कवो 'नादान' छुख छ्वरु छ्वरु करान,
 छिनु यिथ्य यूगी ज़ांह ति मरान ।
 बुथि ति थँव बरकरार सतचिय लँहर ॥



श्रद्धांजली श्री प्यारे लाल हँडू साहब

अनन्तनागुक कोतुय च़ोल लाल ।
 येमिस ओस नाव प्यारे लाल ॥

छुनु पानस तान्य ज़्योन तय मरुन,
 वनु कथ कियुथ तेलि मुंहस फसुन ।
 कथ क्युत वोनान छु मनुश ज़ाल ॥
 बागवती छे तसुंज अर्दशरीर,
 बुजरस लोयनस दूरिरुक तीर ।
 संजेय, रोजेंद्र तस नालुक्य लाल ॥

बिट गुडी चेरी छे तसुंज कोरे,
 दय फोलुराँविनख जोरे सान ।

युथ बक अँसुन तिसन क्युत महाल ॥

नंदलाल आजेन्य कुत्य बागिवान,
 यिम्न ज़ामुत ओस युथ संतान ।
 थ्यकुवैन्य थॉवख पथ कुन मिसाल ॥

कति बनि त्युथ डोख तु तिछ शफकथ,
 त्युथ डोख आसुन छि बॅड रहमथ ।
 दुय तय बावुक च़टान ओस ज़ाल ॥

म्वछि वाहरिथ हमेशि रूद बॉगरान,
 अहंमस कांह ओस नु तस निश स्थान ।
 लूकिस बॅडिस बरान ओस पानय थाल । 2 Dec 2008

जोम तय कॅशीरि हुंद ओस सरताज,
 पनुनि ख्वलकु सुत्यन कोरुन तथ राज ।
 सम्बावु सुत्य ओस माला माल ॥

गरीब गुरबातन ओस रछनवोल,
 कैह वनान पापु तय कैचन मोल ।
 मदगार तिम्न ओस यिम बदुहाल ॥

ज़ानुवुन बायि छुख छुख माह गॉरज़ान,
 ज़ोनुन मा ज़ांह ब्योन ह्यौंद मुस्लमान ।
 दुश्मनन ति ओसुय गरि करान साल ॥

यिथ ह्विब सत प्वरुश कम छि मेलान,
 मरनस यिहुंदिस लुख छि वदान ।
 शाँती बखचिनस पानय दयाल ॥

मॅश्यरोव ह्वरदु हिसु सरकारन,
 गाश हावान यिथ्यन गाश दारन ।

‘नादान’ करान याद छुव मॅश्यरोव सहल ॥

श्रद्धांजली श्री आर के भारतीय साँबस

राम बेयि कृष्ण सुंदर गवन वरताँविथ,

द्राव येमि संसारु श्रु भारती ।

म्वठ ग्यानुच ओस तस वाहराँविथ ॥

प्रिंसी दोखतुर किंग तु राजि गबर जु,

बुथि फिर्य वक्तन चोप ग्रजुवुन सुह ।

उमायि त्रयि गव पथ कुन त्राँविथ ॥

बु बर क्या समंदर अँकिस मिलवारि मंज,

बु अनु कति ताकत करु वनुनुक सुंज ।

तँमि सुंद युस द्राव असि हैछनाँविथ ॥

ब्वछि बेयि नेंद्रि प्यठ काँबू करनवोल,

पजुरस प्यठ पान छेपि दिनुवोल ।

सारिनुय धर्मन हुंद ग्रंथ व्यछनाँविथ ॥

गीता अमर्यथ तस रगन ओस बैरिथुय,

जीवन करान ओस नजर यखसान ।

कर्मन हुंद बोर येतिय नखु वॉलिथ ॥

गरि गरि वनान ओस यि दम छुय गँनीमथ,

क्या खबर छम पगाह मरु मा बो ।

पगहुच काँम कालय अँजराँविथ ॥


काँत्या बागिवान यिमन ओस मेहरबान,

अडल्योक वार ओस कतनावान ।

अडफलिनय द्राव गोड बरनाविथ ॥

व्यछनॉव्य यूगियस यिम ग्वन कृष्णन,
तिमव सान ओस ग्यानुक बंडार ।
अँकिसुय लफज़स देंह मानि च़ॉरिथ ॥

शत शत प्रणाम म्यॉन्य छिय तस यूगियस,
न वुछुम वुन्युखतॉन्य नु वुछन त्युथ कांह ।
'नादानस' ति गव ग्यानु वथ हॉविथ ॥
द्राव येमि संसारु श्रु भारती ॥





सन्तोष शाह 'नादान'